

# Sw Yezhanq Laiz Kauqfaengz Yezsuz

## Kauq Dij Sen Byenqbaenz Dij Goanz

**1** <sup>1</sup> Zwz nduqnduq miz kauq dij Sen, sowh kauq naeh haeuz bwnz miz, sowh kauq naeh daj dij Sen zaemh yuq, sowh kauq naeh zoq zawh dij Sen. <sup>2</sup> Kauq dij Sen zwz nduqnduq daj dij Sen zaemh yuq. <sup>3</sup> Gaeng goj zawh dij Sen aeu gaenq naeh chauq. Daengzle nauq nauq, mboq miz saek yowngh mboq zawh dij Sen aeu gaenq naeh chauq. <sup>4</sup> Kauq dij Sen zawh goaklaeg aen mingh, aen mingh naeh aeu gaenqrungh hawj dij goanz, hawj dij goanz rux leztaen ka loh dij Sen. <sup>5</sup> Gaenqrungh yangz bae gaenq ndaem, gaenq ndaem bex mboq ndaej gaenqrungh.

<sup>6</sup> Miz goanz ux, minxzwh rongx hoak Yezhanq, zawh dij Sen nemz daeuj. <sup>7</sup> Yezhanq daeuj, zawh daeuj haxdoq dij goanz gaenqrungh naeh zawh gaeng, hawj daengzle cholaeng Yezhanq sinq gaenqrungh gaengnaeh baenz. <sup>8</sup> Hoakri Yezhanq mboq zawh gaenqrungh gaengnaeh, dix zawh daeuj haxdoq dij goanz gaenqrungh gaengnaeh zawh gajraeng. <sup>9</sup> Gaenqrungh gaengnaeh zawh gaenqrungh zaeh, zawh daeuj dihndin yangz daengz dij goanz dawj fax nauq. <sup>10</sup> Dawj fax now ndin zawh dij Sen aeu gaenq naeh chauq, gaj zwz gaenq rungh naeh yuq dihndin naeh, dij goanz dihndin

mboq ruxnaj dix. <sup>11</sup> Dix daeuj dih hoakri, gaj dij goanz hoakri mboq zaemz dix. <sup>12</sup> Nanghgaj sowh dij goanz zaemz dix, sinq dix naeh, dix zoq hawj paenqdix daengzle miz qenhliq hoak lug dij Sen. <sup>13</sup> Zoq zawh hax dij Sen haeggaj hoak dez paenqdix, hawj paenqdix byenqbaenz lug dix. Mboq zawh hoakzaq dij goanz dihndin zowngx lug naeh, mboq zawh puj zaiz daj puj nyingz zaemhnoanz ej zowngx daeuj, goj mboq zawh po zawx zowngx ej zowngx daeuj.

<sup>14</sup> Sowh kauq gaengnaeh byenqbaenz goanz ux, daj raeuz zaemh ndowj. Dix yumq nwh raeuz taeuq, aeu gaenqjing haxdoq raeuz. Gaenqraeuz goj ndaej taen dix miz najta, zoq zawh aen najta lug zaiz doag Dez ndaw fax naeh. <sup>15</sup> Yezhanq haxdoq daenh goanz naeh zawh gawz, dix caqsiq hax: "Goanz naeh zoq zawh goanz koax daekgoanq gux hax naeh, gux ndaej hax: 'Goanz daeuj doaklaeng gux naeh, gux naengz mboq zowngx daeuj dix haeuz bwnz miz, baenzaqnaeh dix najta dwx nyeuz gux lai.'" <sup>16</sup> Dij Sen yumq nwh dij goanz taeuq, gaenqraeuz haeuz ndaej sowh gaenq dix aeu hawj daengzndai naeh, dix naengz goq hawj hawj. <sup>17</sup> Dij Sen hawj Moahciz aeu Fahlih haxdoq goanzlai.<sup>a</sup> Gaj dij Sen hawj Yezsuz Jizduz haxdoq dij goanz dix yumq nwh dij goanz

---

<sup>a</sup>1:17 *Moahciz* zawh zwzpujjeq goanz puj zawxkauq dij Sen ux. Dij Sen hawj dix mai fahlih dij Sen, aeu sowh fahlih naeh zau puj Yixsowhle. Yaq Yezsuz Jizduz zawh goanz hoak nauq sowh gaenq fahlih yaix hoak naeh.

taeuq, hawj dix aeu gaenqjing haxdoq dij goanz.<sup>b</sup>  
<sup>18</sup> Mboq sanz miz gawz ndaej taen dij Sen, mizgaj goanz daj puj ndai mboq dungzlumj naeh, hoakri dix goj zawh dij Sen, goanz daj Dez ndaw fax ndiang nyeuz daengzle naeh hawj raeuz ruxndeq dij Sen baenzaqrawz.<sup>c</sup>

### Yezhanq Haxdoq Daenh Dix Mboq Zawh Jizduz

<sup>19–20</sup> Yuq ndaw Yezluqsaxlaengx chaenh puj saeq puj Yaeuhtaiq ruxndeq gaenq Yezhanq hoak naeh. Paenqdix ruxnyinz yaq, paenqdix zoq nemz puj mbud dij Sen daj puj Liqvaeq<sup>d</sup> bae dih Yezhanq naeh, cham dix: "Mawz zawh gawz?" Yezhanq mboq yai paenqdix, daj paenqdix hax swhlit, dix hax: "Gux mboq zawh Jizduz." <sup>21</sup> Paenqdix daeuq cham dix: "Haenx, mawz zawh gawz mawj? Zawh Yixliqyaq vah?"<sup>e</sup> Dix hax: "Gux mboq zawh." Paenqdix daeuq cham: "Zawh goanz puj zawxkauq

dij Sen gaengnaeh vah?"<sup>f</sup> Dix hax: "Mboq zawh."  
<sup>22</sup> Yaq paenqdix zoq hax: "Mawz zawh gawz mux? Mawz haeggaj hax, mawz zawh gawz, hoakzaqnaeh gaenqpiu zux mwz haxdoq sowh dij goanz nemz piu daeuj naeh baenz." <sup>23</sup> Dix hax:

"Gux zoq zawh goanz zwzpujjeq puj zawxkauq dij Sen Yixsaiqyaq ndaej hax naeh, zoq zawh goanz yuq ndaw doanghmowz caqsiq rongx:  
 'Diq swh ka loh Zaeuj' naeh."\*

<sup>24</sup> Sowh dij goanz maz cham naeh paenqdix zawh dij goanz Fahliqsaiq nemz maz.<sup>g</sup> <sup>25</sup> Paenqdix zoq cham Yezhanq: "Mawz mboq zawh Jizduz, mboq zawh Yixliqyaq, goj mboq zawh goanz puj zawxkauq dij Sen gaengnaeh, haenx, mawz baenzaqrawz saeh daenh hoak diauq zauh soiq naeh

<sup>b</sup>1:17 *Jizduz* zawh hax: "Goanz zoah aeu yuz maeghit zoaj ndaw to naeh." Zwzndowj, dij Sen lowg puj Yixsowhleh goanz rawz hoak puj mbud dix, raj lowg goanz rawz hoak hongz puj Yixsowhleh, dix nemz puj Yixsowhleh aeu yuz maeghit zoaj ndaw to sowh goanz dix lowg naeh. Dij Sen tungzgoaq puj zawxkauq dix yinq dij goanz dix, yinq hawj paenqdix goanz Jizduz ux, hawj goanz Jizduz naeh daeuj dihndin jeuq dij goanz daj gvanx dij goanz.

<sup>c</sup>1:18 Mbangj bwnz inxnaeh hax: *Mboq sanz miz gawz ndaej taen dij Sen, mizgaj lug zaiz doag dij Sen, goanz dij Sen nwh taeuq naeh hawj raeuz ruxndeq dij Sen baenzaqrawz.*

<sup>d</sup>1:19–20 Inxnaeh hax puj Liqvaeq mboq zawh hax sowh puj hoak puj mbud dij Sen naeh, zawh hax sowh puj gvanx rownz dij Sen naeh. Puj Liqvaeq zawh luglan Liqvaeq goanz lug zaiz Yaqgowh naeh.

<sup>e</sup>1:21 *Yixliqyaq* zawh zwzpujjeq goanz puj zawxkauq dij Sen ux. Lez Sw Laux hongz Bwnz Daih Aet Naeh, Sw Laux hongz Bwnz Daih Ngih Naeh.

<sup>f</sup>1:21 Zwzpujjeq dij Sen haxdoq Moahciz mwznaj dix rux hawj puj Yixsowhleh miz goanz puj zawxkauq dij Sen ux daj Moahciz dungzlumj, yaix puj Yixsowhleh biak kauq goanz naeh. Lez Sw Fahlih Daih Ngih 18:15, 18.

<sup>g</sup>1:24 Baih *Fahliqsaiq* zawh dij goanz puj Yaeuhtaiq. Paenqdix hax paenqdix biak fahlih Moahciz, gaj paenqdix goj zau daenh sowh gaenq zwzpujjeq zauh naeh.

\*1:23 Yixsaiqyaq 40:3.

mawj?"<sup>h</sup> <sup>26</sup> Yezhanq hax: "Gux zawh aeu naemx saeh dij goanz hoak diauq zauh soiq naeh, gaj miz goanz ux daeuj zawj su, goanz naeh gaenqsu mboq ruxnaj dix. <sup>27</sup> Dix daeuj doaklaeng gux, gux daengz saeh dix hih sai'haiz naengz mboq paeq." <sup>28</sup> Yezhanq hoakzaqnaeh hax zawh zwz dix yuq ka dah Yezdanq baih gaengnaeh, dih dix saeh daenh hoak diauq zauh soiq naeh naeh, yuq ndaw longq Boahdaqnih naeh hax.

### Dij Mbej Ix Dij Sen

<sup>29</sup> Vaenzlaeng, Yezhanq taen Yezsuz daeq maz doq dix, zoq hax: "Su lez, goanz naeh zawh dij mbej ix dij Sen, hawj sowh gaeng dij goanz dihndin hoak loang naeh ni! <sup>30</sup> Goanz naeh zoq zawh goanz koax daekgoanq gux hax naeh, gux ndaej hax: 'Goanz daeuj doaklaeng gux naeh, gux naengz mboq zowngx daeuj dix haeuz bwnz miz, baenzaqnaeh dix najta dwx nyeuz gux lai.' <sup>31</sup> Cholaeng hawj dij goanz puj Yixsowhleh ruxnaj dix zawh gawz, gux aeu naemx saeh goanzlai hoak diauq zauh soiq naeh. Mbaednduq daengz gux goj mboq ruxnaj dix. <sup>32–33</sup> Zwz gux naengz mboq ruxnaj dix naeh, laux nemz gux daeuj aeu naemx saeh daenh hoak diauq zauh soiq naeh, dix daj gux hax: 'Mawz leztaen Minghkoan gux loangz daeuj ndaw ndang gawz, yuq ndang gawz ndowj, gawz zoq zawh goanz aeu minghkoan gux saeh daenh hoak diauq zauh soiq naeh.'" Yaq Yezhanq daeuq hoakzaqnaeh haxdoq

daenh, dix hax: "Gux ndaej taen Minghkoan dij Sen daj noagbiadhaeb dungzlumj loangz daeuj ndaw ndang dix, yuq ndaw ndang dix ndowj. <sup>34</sup> Gux ndaej taen singjringh, zoq haxdoq su: 'Goanz naeh zawh lug zaiz dij Sen.'" <sup>i</sup>

### Le Goanz Cohsaenz Caeu Daekgoanq Naeh

<sup>35</sup> Gvaq vaenz ux yaq, Yezhanq daj song goanz cohsaenz dix zaemh yuq, <sup>36</sup> Yezhanq leztaen Yezsuz gvaq dih naeh, zoq hax: "Su lez, dij mbej ix dij Sen!" <sup>37</sup> Song goanz cohsaenz naeh ruxnyinz kauq dix yaq, zoq bae nowngz Yezsuz. <sup>38</sup> Yezsuz ueq maz, leztaen paenqdix nowngz dix, zoq cham: "Gaenqsu nowngz gux hoak gaeng ah?" Paenqdix hax: "*Lazbix*, mawz yuq rawz ndowj?" *Lazbix* zoq zawh hax lauxswz. <sup>39</sup> Dix hax: "Gaenqsu zaemh mwz lez maj!" Yaq paenqdix zoq mwz lez dih dix ndowj naeh. Gau paenqdix mwz taeng naeh zawh zang'vaenz teq swq denx ux naeh, haemh gaengnaeh paenqdix zoq daj Yezsuz zaemh ndowj. <sup>40</sup> Song goanz ruxnyinz kauq Yezhanq yaq bae nowngz Yezsuz naeh, goanz ux zawh Anzdowhleh goanz nongx zaiz Cizmaenh-Bihdowh naeh. <sup>41</sup> Anzdowhleh dauh maz cha goz dix Cizmaenh daekgoanq, dix haxdoq goz dix: "Gaenqpiu mex *Mihsaiqyaq* eh!" *Mihsaiqyaq* zoq zawh hax Jizduz. <sup>42</sup> Anzdowhleh zoq zowz goz dix mwz dih Yezsuz naeh. Yezsuz lez dix gau ux yaq, hax: "Mawz zawh Cizmaenh goanz lug zaiz Yezhanq naeh, mwznaj rongx mawz hoak Jizfah."

<sup>h</sup>1:25 *Hoak Diauq Zauh Soiq Naeh* zoq zawh hax aeu naemx soiq ndang. Yezhanq aeu naemx saeh sowh puj ndaw zaw gaix naeh hoak diauq zauh soiq naeh, vanz dij Sen yangq gaeng hoakloang paenqdix, hoakzaqnaeh daj aeu naemx saeh paenqdix soiq ndang dungzlumj.

<sup>i</sup>1:34 Mbangj bwnz hoakzaqnaeh hax: *Goanz naeh zawh goanz dij Sen lowg daeuj naeh.*

*Jizfah* zoq zawh hax Bihdowh. *Jizfah* zawh kauq Yaqlanh, Bihdowh zawh kauq Cizlah, daengz song aen minxzwh naeh zawh hax "tin dwx."

### **Yeysuz Caeu Faezliq Daj Nahdanqyeh Hoak Cohsaenz Dix**

<sup>43</sup> Gvaq vaenz ux yaq, Yeysuz loangzdin bae mbanj Zazliqliq. Dix bae taen Faezliq, dix zoq daj Faezliq hax: "Maz nowngz gux, hoak cohsaenz gux." <sup>44</sup> Laemh goanz Faezliq naeh, dix zawh dij goanz ndaw longq Boahsaiqdaq, daj Anzdowhle, Bihdowh zawh daeq dihndeu maz. <sup>45</sup> Faezliq zoq hoak cohsaenz dix, yaq dix bae taen Nahdanqyeh, dix haxdoq Nahdanqyeh: "Goanz ndaw Sw fahlh Moahciz laiz hax rux daeuj naeh, goanz daengzle puj zawxkauq dij Sen mai hax rux daeuj naeh, haeuz daeuj zaeh eh, gaenqpiu haeuz taen eh, dix zoq zawh Yeysuz ndaw longq Nazsahlowh, goanz lug zaiz Yeysowh naeh." <sup>46</sup> Nahdanqyeh hax: "Nazsahlowh naengz rux miz gaeng baenz ndaej ah?" Faezliq hax: "Mawz maz lez!" <sup>47</sup> Yeysuz leztaen Nahdanqyeh daeq maz doq dix, zoq hax: "Su lez, goanz naeh zawh dij goanz Yixsowhle singjringh, ndaw zaw dix mboq goix saek'i." <sup>48</sup> Nahdanqyeh cham dix: "Mawz hoakzaqrawz ruxnaj gux mux?" Yeysuz hax:

"Faezliq naengz mboq goak dwk mawz, mawz yuq goak maex maeg'vowh, gux zoq leztaen mawz yah." <sup>49</sup> Nahdanqyeh hax: "Lazbix, mawz zawh lug zaiz dij Sen, mawz zawh laux hongz Yixsowhle!" <sup>50</sup> Yeysuz hax: "Cholaeng gux haxdoq mawz 'Gux leztaen mawz yuq goak maex maeg'vowh,' mawz zoq sinq yax? Mawz naengz rux ndaej taen sowh saeh dwx nyeuz sowh saeh naeh." <sup>51</sup> Dix daeuj hax: "Gux haxdoq su swhlit, gaenqsu rux ndaej taen fax aj, boangx Bin dij Sen yuq ndang gux Lug dij Goanz kwnj loangz kwnj loangz."<sup>j</sup>

### **Yeysuz Hawj Naemx Byenqbaenz Laeuj**

**2** <sup>1</sup> Vaenz daih sam, mbanj Zazliqliq longq Zaznah naeh miz goanz hoak qiag raep loz, meh Yeysuz yuq dih naeh. <sup>2</sup> Daenh goj qingj Yeysuz daj cohsaenz dix, paenqdix goj bae hoak qiag. <sup>3</sup> Laeuj ndut nauq, meh Yeysuz daj dix hax: "Paenqdix mboq miz laeuj yah." <sup>4</sup> Yeysuz hax: "Meh, gaeng naeh daj raeuz miz gaeng mux?<sup>k</sup> Zwz gux naengz mboq taeng." <sup>5</sup> Meh dix daj puj koj hax: "Dix nemz su hoak gaeng, su zoq hoak gaeng." <sup>6</sup> Dih naeh miz choak aen rangz tin, aen ux laep teq song sam doangj naemx ux naeh, zawh hawj puj Yaeuhtaiq hoak sowh gaeng zauh hawj hoakri saw naeh. <sup>7</sup> Yeysuz

---

**j1:51** Yeysuz kwnzkwnz aeu aen minxzwh Lug Dij Goanz naeh nyaek hoakri. Aen minxzwh **Lug Dij Goanz** naeh yuq Sw Danqyixlix 7:13-14. Pujzawxkauq dij Sen, Danqyixlix, hax: *Zang'haemh gux daj paen'hwnz dungzlumj leztaen miz goanz ux daj lug dij goanz dungzlumj. Dix kviq pajfax maz dih dij Sen bwnzmiz miz daengznauq naeh. Daenh zoq lingz dix mwz doqnaj dij Sen naeh. Gaenqdix ndaej dawjfax sowh rux gvanx daengzle naeh, gaj goanz gaj biangz dix, gaj goanz gaj biak dix. Hoakzaqnaeh, goh rawz gojvenj, changz rawz gojvenj, dij goanz hax sowh kauq rawz gojndae daengzle biangz dix, nwngz dix. Lug dij Goanz gvanx daenh daengznauq, mboq miz gawz hawj goh dix lown.*

**k2:4** *Meh, gaeng naeh daj raeuz miz gaeng mux?* Gaemz naeh, bwnz aeu kauq Cizlah laiz naeh hoakzaqnaeh hax: *Yah nyingz aj, mawz daj gux miz gaeng mux?* Yeysuz hoakzaqnaeh rongx meh dix hoak *yah nyingz* mboq zawh hax dix mboq aeu meh dix hoak meh dix, zawh hax dix baenz biak kauq Dez ndaw Fax. Yeysuz goj zawh lug zaiz Maxliqyaq, gaj dix goj zawh lug zaiz dij Sen.

daj puj koj hax: "Aeu naemx zoaj bae ndaw rangz daem nauq." Paenqdix zoq aeu naemx zoaj bae ndaw rangz daem nauq, taengdeg baeg rangz. <sup>8</sup> Yezsuz daeuq hax: "Gannaeh daek maz, aeu mwz hawj goanz gaem kaeujpyaek naeh." Paenqdix zoq aeu mwz. <sup>9</sup> Goanz gaem kaeujpyaek naeh jimz sowh laeuj naemx byenqbaenz naeh, mboq ruxndeq aeu rawz maz, mizgaj sowh puj koj daek naemx naeh ruxndeq. Goanz gaem kaeujpyaek naeh zoq rongx goanz aeu mez naeh maz, <sup>10</sup> daj dix hax: "Gawz goj zawh aeu laeuj ndae baiz daekgoanq, taj puj qiang ndut imq yaq, zux baiz sowh laeuj tuk nyeuz naeh, gaj mawz aeu laeuj ndae nyaengx taeng gannaeh." <sup>11</sup> Baez naeh zawh baez nduq Yezsuz hoak sowh saeh ndaw fax naeh, zawh yuq ndaw mbanj Zazliqliq longq Zaznah naeh hoak, Yezsuz hoak gaenq naeh hawj daenh ruxndeq dix miz najta, cohsaenz dix zoq sinq dix. <sup>12</sup> Gvaq mbaed naeh yaq, Yezsuz daj meh dix, nongx dix, cohsaenz dix, bae longq Zazbowhnungh, yuq dih naeh ndowj ndaej jii vaenz ux.

### Yezsuz Hawj Aen Rownz Dij Sen Saw

<sup>13</sup> Zaekgaj taeng jeng puj Yaeuhtaiq jeng rongx hoak Jeng Gvaq naeh,<sup>1</sup> Yezsuz zoq mwz Yezluqsaxlaengx chaenh. <sup>14</sup> Dix leztaen gumhhongh rownz dij Sen miz puj kai dij moaz, dij mbej,

noagbiadhaeb, goj miz sowh puj lwh ngaenzjenz naeh yuq dih naeh naengh.<sup>m</sup> <sup>15</sup> Dix zoq aeu zowg hoak laenj maexfaet ux, daem paenqdix daj dij moaz, dij mbej paenqdix ni ndaw gumhhongh. Dix zoaj ngaenzjenz sowh puj lwh ngaenzjenz naeh, ngex aen zongz paenqdix laemx. <sup>16</sup> Dix daeuq daj sowh puj kai noagbiadhaeb naeh hax: "Ban le gaenqnaeh ni, laek aeu rownz Dez gux hoak hangzhw." <sup>17</sup> Cohsaenz dix zoq nyen ndaej ndaw *Sw Dij Sen* hoakzaqnaeh laiz: "Rownz dij Sen yuq ndaw zaw gux zungqyauq taeuq, daenh lezmbosansq dix, gux yinx mboq ndaej zaeh zaeh ah."<sup>n</sup>

<sup>18</sup> Puj Yaeuhtaiq cham dix: "Mawz hoak sowh saeh ndaw fax naeh sowh rawz hawj piu lez, hawj piu ruxndeq mawz miz qenhliq hoak sowh saeh naeh mux?" <sup>19</sup> Yezsuz yaeng: "Gaenqsu lid aen rownz dij Sen naeh, sam vaenz gux daeuq daengj dix ndae." <sup>20</sup> Puj Yaeuhtaiq hax: "Aen rownz dij Sen naeh daengj siqsip-choak bi zux daengj ndae, mawz sam vaenz daeuq daengj dix ndae ndaej ix?" <sup>21</sup> Gaj aen rownz Yezsuz hax naeh mboq zawh hax aen rownz dij Sen yuq doqnaj paenqdix naeh, zawh hax ndang dix. <sup>22</sup> Baenzaqnaeh, Yezsuz tai yaq vaenz daih sam daeuq zaeu yaq, cohsaenz dix nwh ndaej dix ndaej hax gaemz kauq naeh, zoq sinq *Sw Dij Sen* daj sowh kauq Yezsuz hax naeh.

---

**2:13** *Jeng Gvaq* zawh puj Yaeuhtaiq bi ux jin gongghw ux hoak gaenq nyen zwzpujjeq dij Sen zowz paenqdix ni ndaw Aizjih. Gaj laux hongz Aizjih mboq hawj paenqdix ni, dij Sen nemz bin dix goanz ux daeuj kaj lug zaiz to sowh dij goanz yuq ndaw Aizjih naeh. Gaj jixzawh baegdu rownz gawz miz lowd dij mbej ix, bin dij Sen zoq gvaq bae, mboq mwz ndaw rownz, kaj lug zaiz to. Hoakzaqnaeh zoq rongx hoak *Jeng Gvaq*.

**2:14** Zwz naeh aen rownz dij Sen yuq Yezluqsaxlaengx chaenh, zawh hawj dij goanz dihndin biangz dij Sen, daj dij Sen hax kauq.

**2:17** Gaemz kauq naeh yuq *Sw Lownx* 69:9.

## Yeysuz Ruxndeq Ndaw Zaw

### Dij Goanz Nwh Gaeng

<sup>23</sup> Zwz Yeysuz yuq ndaw Yezluqsaxlaengx jin Jeng Gvaq naeh, miz goanz lai taeuq leztaen sowh saenh yaengh saenh dix hoak naeh, zoq sinq dix zawh Jizduz. <sup>24</sup> Dix ruxndeq dij goanz daengzle nauq, baenzzaqnaeh dix mboq hawj hoakri maengx paenqdix. <sup>25</sup> Dix ruxndeq ndaw zaw dij goanz nwh gaeng, baenzzaqnaeh dix yungq mboq zoah dij goanz haxdoq dix dij goanz baenzzaqrawz.

## Yeysuz Daj Laux Nihgozdowhmuq

### Naeh Laemh Kauq

**3** <sup>1</sup> Miz goanz Fahliqsaiq ux, minxzw h rongx hoak Nihgozdowhmuq, zawh puj saeq puj Yaeuhtaiq. <sup>2</sup> Dix zang'haemh maz dih Yeysuz naeh, daj Yeysuz hax: "Lazbix, jixzawh mboq miz dij Sen daj mawz zaemh yuq, sowh saenh yaengh saenh mawz hoak naeh, mboq miz gawz rux hoak, baenzzaqnaeh piu ruxndeq mawz zawh dij Sen nemz daeuj zau daenh." <sup>3</sup> Yeysuz yaeng: "Gux haxdoq mawz swilit, dij goanz jix mboq zawh daeuq rungj daeuj mbaedmawq, zoq mboq ndaej hoak dij goanz Goh dij Sen." <sup>4</sup> Nihgozdowhmuq hax: "Dij goanz haeuz jeq yaq, hoakrawz rux daeuq rungj daeuj mux? Nazniz gawz naengz rux ndonj mwz ndaw dongx meh hoakri rungj daeuj mbaedmawq baenz ah?" <sup>5</sup> Yeysuz yaeng: "Gux haxdoq mawz swilit, dij goanz jix mboq zawh Minghkoan dij

Sen daj naemx rungj, zoq mboq ndaej mwz Goh dij Sen. <sup>6</sup> Ndang mbaednduq zawh dij goanz rungj daeuj, gaj minghkoan mawq zawh Minghkoan dij Sen rungj daeuj. <sup>7</sup> Laek cholaeng gux daj mawz hax: 'Gaenqsu daeuq rungj daeuj mbaedmawq zuxbaenz.' Laek cholaeng gaemz kauq naeh sawz. <sup>8</sup> Laemz zawx baeuq bae rawz zoq baeuq bae rawz, mawz ruxnyinz hiang dix, gaj mboq ruxndeq dix daeq rawz daeuj, mwz rawz. Minghkoan dij Sen hawj gawz daeuq rungj mbaedmawq zwzrawz goj zawh baenzzaqnaeh." <sup>9</sup> Nihgozdowhmuq hax: "Baenzrawz rux miz sowh saeh naeh mux?" <sup>10</sup> Yeysuz hax: "Mawz zawh lauxswz dij goanz Yixsowhle, naengz mboq ruxndeq mbaed saeh naeh maj?" <sup>11</sup> Gux haxdoq mawz swilit, gaenqpiu ruxndeq, gaenqpiu zux laemh. Gaenqpiu ndaej taen, gaenqpiu zux haxdoq su, gaj gaenqsu mboq sinq sowh gaenq piu hax naeh. <sup>12</sup> Gux daj su laemh sowh saeh dihndin naeh, gaenqsu naengz mboq sinq, jixzawh gux daj su laemh sowh saeh ndaw fax naeh, gaenqsu hoakrawz sinq mux? <sup>13</sup> Mizgaj Lug Dij Goanz daeq ndaw fax loangz daeuj naeh,<sup>P</sup> gvaqmaz mboq sanz miz gawz ndaej mwz ndaw fax. <sup>14</sup> Moahciz yuq ndaw doanghmowz hoakzawz yaeuj dij nguz dongz,\* goanz rongx hoak Lug Dij Goanz naeh goj daj dij nguz dongz dungz lumj zaemh zoah yaeuj mboqyaq, <sup>15</sup> hawj sowh puj sinq dix naeh daengzle ndaej aen mingh daengznauq. <sup>16</sup> Unj, dij Sen nwh dij goanz dihndin, daengz lug zaiz doag dix naengz aeu hawj dij goanz dihndin, hawj sowh puj

<sup>o</sup>3:3 Goh dij Sen zoq zawh hax dij Sen haeggaj daeuj gvanx dij goanz dix, gvanx daengzle sowh gaenq dix chauq naeh.

<sup>P</sup>3:13 Mbangj bwnz hoakzaqnaeh hax: *Mizgaj Lug Dij Goanz daeq ndaw fax loangz daeuj yaq goj naengz yuq ndaw fax naeh.*

\*3:14 Anq Yixsowhle 21:9.

sinq lug dix naeh daengzle nauq mboq zoah lown, gajfa ndaej aen mingh daengznauq.<sup>17</sup> Zoq zawh hax, dij Sen nemz lug zaiz dix daeuj dihndin, mboq zawh daeuj hawj dij goanz haeggaj tw sowh gaenq hoakri hoak loang naeh, zawh daeuj jeuq dij goanz dihndin.<sup>18</sup> Gawz sinq lug zaiz dij Sen, dij Sen zoq mboq hawj gawz haeggaj tw sowh gaenq dix hoak loang naeh; gawz mboq sinq, dij Sen haeuz dingq hawj dix haeggaj tw sowh gaenq dix hoak loang naeh eh. Baenzaqrawz mah? Sowh goanz naeh mboq sinq lug zaiz doag dij Sen.<sup>19</sup> Gaenqrungh daeuj dihndin<sup>9</sup>, dij goanz dihndin cholaeng hoakri hoak gaenq ndoagndaeg, mboq ngaiq rungh, gajfa daeuj ngaiq ndaem, dij Sen hawj paenqdix haeggaj tw sowh gaenq paenqdix hoak loang naeh zawh cholaeng gaenq naeh.<sup>20</sup> Gawz hoak gaenq ndoagndaeg, gawz zoq mbu sowh gaenq ndoagndaeg dix hoak naeh meq maz. Baenzaqnaeh dix zoq hwnq gaenqrungh, mboq maz zawj gaenqrungh.<sup>21</sup> Gawz biak kauqjing, zoq zawh hax, gawz biak kauq dij Sen bae hoak, gawz zoq maz zawj gaenqrungh, hoakzaqnaeh hawj daenh ruxndeq sowh gaenq dix hoak naeh zawh maengx dij Sen hoak."

### Yezhanq Laemh Gaenq Yezsuz Dwk Daenh

<sup>22</sup> Gvaq ndauj ux yaq, Yezsuz daj cohsaenz dix mwz mbanj Yaeuhdaq, dix daj paenqdix zaemh yuq ndaw ka'mowngz dih naeh ndowj, saeh daenh hoak diauq zauh soi q naeh.<sup>23–24</sup> Zwz naeh Yezhanq naengz baeq mwz kaeng lauz. Dix yuq ndaw Aiqnaenq dih haenz Saxlaengx naeh ndowj. Dix goj

saeh daenh hoak diauq zauh soi q naeh, unj dihnaeh miz naemx lai, daenh zoq bae dihnaeh hawj dix saeh hoak diauq zauh soi q naeh.<sup>25</sup> Cohsaenz Yezhanq daj goanz puj Yaeuhtaiq ux dungzjinj sowh gaenq zauh hoak hawj dij goanz saw naeh.<sup>26</sup> Paenqdix maz dih Yezhanq naeh, daj dix hax: "Lazbix, goanz koax daekgoanq mawz yuq ka dah Yezdanq baih gaengnaeh hax dix zawh lug zaiz dij Sen naeh, gannaeh dix goj saeh daenh hoak diauq zauh soi q naeh, daengzle bae dih dix naeh hoak diauq zauh soi q naeh."<sup>27</sup> Yezhanq yaeng: "Jix mboq zawh ndaw fax aeu hawj, dij goanz zoq mboq rux ndaej gaeng.<sup>28</sup> Gux ndaej hax yaq, gux mboq zawh Jizduz, zawh goanz daeuj lauh ka loh hawj dix naeh naeuj. Gaemz kauq naeh su ndaej biaknyinz singiringh.<sup>29</sup> Hoakqiag raep loz zawh goanz aeu mez naeh ndaej mijmez, dungzbownh goanz aeu mez naeh in yuq haenz biak, ruxnyinz hiang goanz aeu mez naeh zoq faengz. Gannaeh gux daj goanz dungzbownh goanz aeu mez naeh dungzlumj, gux ruxnyinz dij goanz bae nowngz Yezsuz, gux goj faengz taeuq.<sup>30</sup> Dix kwnj huhhuh zuxbaenz, gux loangz runhrunh zuxbaenz."

### Goanz Daeq Ndaw Fax Daeuj Naeh

<sup>31</sup> Goanz daeq dihndin maz naeh, zawh gaenq dihndin naeuj, gaenq dix hax naeh goj zawh gaenq dihndin naeuj. Gaj goanz daeq ndaw fax daeuj naeh, zawh yuq now daengzle.<sup>f</sup> Goanz daeq ndaw fax daeuj naeh<sup>32</sup> aeu sowh gaenq dix taen singjringh naeh daj sowh gaenq dix ruxnyinz singjringh naeh haxdoq daenh, gaj mboq miz gawz sinq sowh gaenq

<sup>9</sup>3:19 Inxnaeh gaenqrungh zoq zawh hax Yezsuz hoakri.

<sup>f</sup>3:31 *Goanz daeq ndaw fax daeuj naeh zawh yuq now daengzle*: Mbangj bwnz hax gaemz naeh song mbaed.

dix hax naeh. <sup>33</sup> Gawz siq sowh gaenq dix hax naeh, zoq zawh hax dix yinq sowh gaenq dij Sen hax naeh zawh zaeh. <sup>34</sup> Dij Sen aeu Minghkoan dix hawj goanz dix nemz daeuj naeh, hawj daengz mboq rux gah, baenzaqnaeh, goanz dij Sen nemz daeuj naeh zawh hax kauq dij Sen. <sup>35</sup> Dez ndaw fax nwh lug zaiz doag dix, haeuz aeu daengzle nyaengx mwz ndaw mungz dix. <sup>36</sup> Gawz siq lug, ndaej aen mingh daengznauq naeh. Gawz mboq siq lug, toj mboq ndaej aen mingh daengznauq naeh, yaq naengz zoah dij Sen rikdwk chaenxfah daengznauq.

### Yeysuz Daj Yah Ndaw

#### Saxmaxliqyaq Ux Laemh Kauq

**4** <sup>1</sup> Yeysuz ruxndeq dij goanz Fahliqsaiq ruxnyinz gannaeh cohsaenz dix miz lai nyeuz cohsaenz Yezhanq, ruxnyinz hax dix saeh cohsaenz dix hoak diauq zauh soiq naeh. <sup>2</sup> Gaj laemh zaeh maz mboq zawh ndang'hoz Yeysuz saeh gawz hoak diauq zauh soiq naeh, zawh cohsaenz dix haeggaj saeh cohsaenz dix hoak diauq zauh soiq naeh. <sup>3</sup> Dix zoq ni mbanj Yaeuhdaq, daeuq dauh bae mbanj Zazliqliq. <sup>4</sup> Dauh bae mbanj Zazliqliq dij baenz gvaq zoah mbanj Saxmaxliqyaq. <sup>5</sup> Yaq dix zoq bae, bae taeng mbanj Saxmaxliqyaq aen chaenh ux, minxwh rongx hoak Ciqzaz, dih naeh yuq zawj mbamq namh Yaqgowh aeu hawj lug zaiz dix Yeysowh naeh.\* <sup>6</sup> Dih naeh miz aen mboq ux rongx hoak aen mboq Yaqgowh. Yeysuz daeqloh moih gvaq, zoq naengh haenz mboq. Gau gaengnaeh zawh teq baenz ngaiz ux naeh.

<sup>7</sup> Miz yah Saxmaxliqyaq ux daeuj daek naemx. Yeysuz daj dix hax: "Aeu naemx hawj gux dex

ndut umq ux mah." <sup>8</sup> Laemh gau gaengnaeh, cohsaenz dix mwz ndaw chaenh swx gaenjinn. <sup>9</sup> Yah Saxmaxliqyaq naeh daj Yeysuz hax: "Mawz zawh puj Yaeuhtaiq, baenzrawz daj gux yah Saxmaxliqyaq ux aeu naemx ndut mux?" Laemh zwz naeh puj Yaeuhtaiq mboq daj dij goanz Saxmaxliqyaq bae'dauh. <sup>10</sup> Yeysuz yaeng dix: "Jixzawh mawz haeuz ruxndeq sowh gaenq dij Sen aeu hawj dij goanz daengzhwx naeh, goj haeuz ruxndeq goanz daj mawz hax 'Aeu naemx hawj gux dex ndut umq ux mah' naeh zawh gawz, mawz zoq vanz dix yaq eh, dix goj toj aeu naemx zaeu hawj mawz yaq eh." <sup>11</sup> Yah gaengnaeh hax: "Cuh aj, mawz mboq miz sowh gaenq aeu daek naemx naeh, aen mboq naeh goj ndaek mawh. Mawz bae rawz aeu naemx zaeu maz ah? <sup>12</sup> Puj jeq rownz piu Yaqgowh aeu aen mboq naeh leux hawj piu. Hoakri dix daj luglan dix, doihdo dix daengzle zawh ndut naemx aen mboq naeh. Dix naengz mboq rux aeu naemx zaeu hawj piu. Gaj mawz hax mawz rux aeu naemx zaeu hawj gux. Mawz naengz haen nyeuz dix, dwx nyeuz dix maj?" <sup>13</sup> Yeysuz yaeng: "Gawz ndut sowh naemx naeh, gawz goj naengz rux daeuq yaeg, <sup>14</sup> gaj jixzawh gawz ndut sowh naemx gux aeu hawj naeh, zoq mboq rux yaeg daengznauq. Sowh naemx gux aeu hawj naeh yuq ndaw dix daj dih naemx og dungzlumj, lae uad'uad, hawj dix ndaej aen mingh daengznauq naeh." <sup>15</sup> Yah gaengnaeh hax: "Cuh aj, vanz mawz aeu sowh naemx naeh hawj gux, hawj gux mboq yaeg naemx, goj mboq ndaej daeuq daeuj inxnaeh daek naemx."

\*4:5 Zwz Nduq 33:19; 48:22; Yeysuzyaq 24:32.



<sup>16</sup> Yežsuz hax: "Mawz mwz rongx po mawz, yaq daeuq daeuj inxnaeh." <sup>17</sup> Yah gaengnaeh daj dix hax: "Gux mboq miz po." Yežsuz hax: "Mawz hax mawz mboq miz po dauq mboq loang." <sup>18</sup> Mawz ndaej miz haj goanz po, gaj goanz gannaeh mawz miz naeh mboq zawh po mawz. Gaemz kauq mawz hax naeh zawh zaeh." <sup>19</sup> Yah gaengnaeh hax: "Cuh aj, gux lez ndaej og, mawz zawh puj zawxkauq dij Sen." <sup>20</sup> Puj jeq Saxmaxliqyaq rownz piu zauh yuq bo naeh biangz dij Sen, gaj puj Yaeuhtaiq su hax Yežluqsaxlaengx zux zawh dih biangz dij Sen." <sup>21</sup> Yežsuz yaeng: "Yah nyingz aj, gux haxdoq mawz swilit, zaekgaj taeng zwz yah, taeng zwz naeh gaenqsu biangz Dez ndaw fax, mboq zawh yuq bo naeh, goj mboq zawh yuq Yežluqsaxlaengx." <sup>22</sup> Gaenqsu biangz dij Sen, gaj gaenqsu mboq ruxnaj dix. Gaenqpiu biangz dij Sen gaj gaenqpiu ruxnaj dix. Baenzaqrawz mah? Dij Sen aeu puj Yaeuhtaiq jeuq dij goanz. <sup>23</sup> Gaj zaekgaj taeng zwz yah, gannaeh zoq zawh, gawz nganq kauqjing aeu zaw biangz Dez ndaw fax, gawz zux suanq zawh sowh puj biangz dij Sen naeh zaeh. Unj Dez ndaw fax zawx hawj sowh dij goanz naeh hoak puj biangz dix. <sup>24</sup> Dij Sen zawh minghkoan, gawz biangz dix zoq baenz nganq kauqjing aeu zaw biangz dix." <sup>25</sup> Yah gaengnaeh hax: "Gux ruxndeq *Mihσαιqyaq* goanz goj rongx hoak Jizduz naeh rux daeuj. Dix daeuj zwzrawz, dix toj aeu daengzle haxdoq piu." <sup>26</sup> Yežsuz hax: "Goanz gannaeh daj mawz hax kauq naeh zoq zawh dix."

<sup>27</sup> Sowh gaunaeh, cohsaenz Yežsuz dauh daeuj. Paenqdix leztaen Yežsuz daj yah gaengnaeh hax

kauq, zoq sawz taeuq, gaj mboq miz gawz cham: "Mawz aeu gaeng?" Rux: "Mawz baenzaqrawz daj yah naeh hax kauq?"<sup>s</sup> <sup>28</sup> Yah gaengnaeh jizzaz aen doangj dix, daeq mwz ndaw chaenh, daj goanzlai hax: <sup>29</sup> "Gaenqsu bae lez, miz goanz ux, gux ndaej hoak gaeng raeuh dix goj hax og daeuj nauq, goanz naeh lau zawh Jizduz max?" <sup>30</sup> Goanzlai zoq og ndaw chaenh bae, bae dih Yežsuz naeh.

<sup>31</sup> Gau gaengnaeh, cohsaenz Yežsuz daj Yežsuz hax: "Lazbix, jin mah." <sup>32</sup> Yežsuz hax: "Gaenqgux miz gaenqjin jin, zawh sowh gaenq gaenqsu mboq ruxndeq naeh." <sup>33</sup> Cohsaenz Yežsuz goanz lej daj goanz hax: "Gawz aeu gaeng hawj dix jin maznoax?" <sup>34</sup> Yežsuz hax: "Biak kauq laux nemz gux daeuj naeh, hoak najgaengx dix ndae, gaenq naeh zoq zawh gaenq jin gux eh." <sup>35</sup> Gaenqsu mboq zawh hoakzaqnaeh hax mawx: 'Naengz miz siq ndown tem zux taeng zwz caeu.' Gaj gux haxdoq su, ngangh to su lez bae doq ndaw naz, kaeujpyaek haeuz baenz jin yah, baenz caeu yah. <sup>36</sup> Puj caeu kaeujpyaek haeuz ndaej vaenzriangz, sowh kaeujpyaek paenqdix caeu naeh miz daengznauq. Hoakzaqnaeh puj ndaem daj puj caeu zaemh faengz. <sup>37</sup> Kauq daenh bwnz leuz: 'Goanz ux ndaem, goanz ux caeu.' Gaemz kauq naeh zawh zaeh. <sup>38</sup> Gux nemz su bae caeu sowh kaeujpyaek su mboq ndaej ndaem naeh. Sowh puj ndaem naeh kux, gaenqsu bae caeu, gaenqsu zawh ndaej laeng paenqdix."

<sup>39</sup> Vaenz gaengnaeh yah gaengnaeh mwz haxdoq daenh, haxdoq daenh dix ndaej taen Yežsuz baenzaqrawz raeuh, dix hax: "Gux ndaej hoak gaeng raeuh goanz naeh goj hax og maz nauq."

<sup>s</sup>4:27 Zwzndai puj zaiz puj Yaeuhtaiq mboq daj puj nyingz Saxmaxliqyaq hax kauq.

Baenzzaqnaeh, doaklaeng aen chaenh gaengnaeh, dij goanz Saxmaxliqyaq miz goanz lai taeuq sinq Yezsuz. <sup>40</sup>Yaq paenqdix daeuj dih Yezsuz naeh, vanz dix daj paenqdix zaemh ndowj, Yezsuz zoq yuq dih gaengnaeh ndowj song vaenz. <sup>41</sup>Cholaeng kauq Yezsuz, puj sinq Yezsuz zoq gajfa miz lai. <sup>42</sup>Paenqdix daj yah gaengnaeh hax: "Gannaeh gaenqpiu sinq, mboq zawh cholaeng suq kauq mawz hax naeh, zawh gaenqpiu haeggaj ndaej biak dix hax, gannaeh piu zoq ruxndeq dix zawh Zaeuj daeuj jeuq dij goanz dawj fax naeh zaeh."

### **Yezsuz Ya Lug zaiz Laux Saeq Ux Ndae**

<sup>43–44</sup>Yezsuz ndaej hax: "Pujzawxkauq dij Sen yuq goakrownz hoakri mboq miz gawz zaenzzungq goah." Baenzzaqnaeh gvaq song vaenz yaq, Yezsuz ni dih puj Saxmaxliqyaq, daeq maz naj, maz mbanj Zazliqliq. <sup>45</sup>Zwz dij goanz Zazliqliq mwz ndaw Yezluqsaxlaengx jin Jeng Gvaq naeh, paenqdix ndaej taen sowh saeh Yezsuz hoak naeh, baenzzaqnaeh, Yezsuz maz taeng Zazliqliq yaq, dij goanz dih naeh zaemz dix taeuq. <sup>46</sup>Yezsuz daeuq bae ndaw Zazliqliq longq Zaznah naeh, zoq zawh dih koax daekgoanq dix hawj naemx byenqbaenz laeuj naeh. Miz goanz puj saeq ux, lug zaiz dix yuq ndaw longq Zazbowhnuh baenzchaej. <sup>47</sup>Lug zaiz dix zaekgaj tai, dix ruxnyinz Yezsuz daeq mbanj Yaeuhdaq daeuj taeng mbanj Zazliqliq, zoq mwz dih Yezsuz naeh, vanz Yezsuz bae ya lug zaiz dix. <sup>48</sup>Yezsuz daj dix hax: "Jixzawh gaenqsu lez mboq taen sowh saeh ndaw fax naeh, gaenqsu zoq

mboq sinq zaeh zaeh." <sup>49</sup>Goanz saeq gaengnaeh hax: "Cuh aj, jixzawh mawz mboq daj gux bae kvaig, lug gux toj tai mboqyaq, vanz mawz daj gux zaemh bae mah." <sup>50</sup>Yezsuz haxdoq dix: "Dauh bae ndeh, lug zaiz mawz zaeu mwznaj ndaej eh." Goanz gaengnaeh sinq gaemz kauq Yezsuz daj dix hax naeh, zoq dauh bae. <sup>51</sup>Gau dix dauh bae naeh, paenq kojij dix daeq maz raep dix, haxdoq dix lug zaiz dix ndae yaq. <sup>52</sup>Dix zoq cham puj kojij dix, lug dix daeq zwzrawz rowngh maz. Paenqdix hax: "Vaenzvaz ngaiz yaq yih denx, nowx ndaed dix zoq zumx maz." <sup>53</sup>Dix zoq ruxndeq gau gaengnaeh zoq zawh gau Yezsuz daj dix hax: "lug zaiz mawz zaeu mwznaj ndaej eh" naeh. Hoakri dix daj daengz rownz dix nauq zoq sinq Yezsuz zawh Zaeuj. <sup>54</sup>Baez naeh zawh baez daih ngih Yezsuz yuq ndaw Zazliqliq hoak sowh saeh ndaw fax naeh, zawh dix daeq ndaw Yaeuhdaq dauh daeuj yaq hoak.

### **Yezsuz Yuq Haenz Vaengz Naemx**

#### **Bihseqdaq Ya Goanz Pujchaej Ux Ndae**

**5** <sup>1</sup>Gvaq ndauj ux yaq, zoq taeng jeng puj Yaeuhuaiq jeng ux, Yezsuz zoq mwz Yezluqsaxlaengx. <sup>2</sup>Yuq ndaw Yezluqsaxlaengx, miz baegdu ux rongx hoak "Baegdu Dij Mbej," haenz dih naeh miz vaengz naemx ux, hax kauq Cizboahlaiz rongx hoak "Bihseqdaq," haenz vaengz naemx naeh miz haj aen yauj. <sup>3</sup>Dih naeh miz puj chaej gunz goanz lai taeuq, miz puj ta'mbud, puj ka'ndiak, puj qenka mboq rux chaeg. <sup>4</sup><sup>5</sup>Dih naeh miz goanz ux, chaej ndaej samsip-biad bi. <sup>6</sup>Yezsuz

---

<sup>5:4</sup> Mbanj bwnz miz gaemz kauq naeh: *Bin Zaeuj taeng zwz maz zoq vae vaengz naemx naeh, naemx chaeg yaq, gawz loangz bae daekgoanq, daengz miz gaeng chaej goj ndae nauq. Baenzzaqnaeh paenqdix yuq dih naeh taj naemx chaeg.*

leztaen dix gunz dih naeh, ruxndeq dix chaej ndaej ndowj, zoq cham dix: "Mawz zawx ndae vah?"

<sup>7</sup>Goanz puj chaej naeh yaeng: "Cuh aj, gau naemx chaeg naeh, mboq miz gawz aeu gux nyaengx bae vaengz naemx, sowh gau gux zaekgaj bae naeh, zoah daenh longx bae daekgoanq." <sup>8</sup>Yezsuz daj dix hax: "Dwnq maz, gaem faz mawz daeq ndeh."

<sup>9</sup>Goanz gaengnaeh cenq ndae, zoq gaem faz dix daeq. Vaenz gaengnaeh zawh Vaenz Cednoiq.

<sup>10</sup>Baenzaqnaeh, puj saeq puj Yaeuhtaiq daj goanz aen chaej zoah ya ndae naeh hax: "Vaenznaeh zawh Vaenz Cednoiq, mawz gaem faz mboq hoj."<sup>u</sup> <sup>11</sup>Gaj dix yaeng: "Goanz hawj gux ndae naeh daj gux hax: 'Gaem faz mawz bae ndeh.'" <sup>12</sup>Paenqdix zoq cham dix: "Goanz daj mawz hax: 'Gaem faz mawz bae ndeh' naeh zawh gawz ah?" <sup>13</sup>Dihnaeh miz goanz lai taeuq, Yezsuz haeuz ueg ni yaq, baenzaqnaeh, goanz gaengnaeh mboq ruxndeq goanz ya dix ndae naeh zawh gawz.

<sup>14</sup>Gvaq ndauj ux yaq, Yezsuz yuq rownz dij Sen cha mex goanz gaengnaeh, dix daj goanz gaengnaeh hax: "Aen chaej mawz dauq ndae yaq, gaj laek daeuq hoak loang, yaj mawz rux daeuq miz yowngh ndai naengz dohbaeuh nyeuz miz aen chaej." <sup>15</sup>Goanz gaengnaeh bae haxdoq puj saeq puj Yaeuhtaiq, hax goanz hawj dix ndae naeh zawh Yezsuz. <sup>16</sup>Yezsuz yuq Vaenz Cednoiq hoak sowh saeh naeh, puj saeq puj Yaeuhtaiq zoq vazkuz dix. <sup>17</sup>Yezsuz daj paenqdix hax: "Dez gux hoak najgaengx taengdeg gannaeh, gux goj hoak najgaengx." <sup>18</sup>Cholaeng Yezsuz mboq gaem Vaenz Cednoiq, yaq naengz

rongx dij Sen hoak Dez dix, aeu hoakri hoak daj dij Sen baenzndeu, baenzaqnaeh puj saeq puj Yaeuhtaiq zoq gajfa nwh kaj dix.

<sup>19–20</sup>Yezsuz zoq daj paenqdix hax: "Gux haxdoq su swhlit, daengz gux zawh Lug zaiz dij Sen, gux goj mboq rux haeggaj hoak gaeng, mizgaj leztaen sowh gaenq Dez ndaw fax hoak naeh, gux zux hoak. Dez ndaw fax ngaiq Lug, hoakri dix hoak gaeng raeuh, dix goj jix hawj Lug lez. Baenzaqnaeh gux leztaen Dez ndaw fax hoak gaeng, gux zux hoak gaeng. Dez ndaw fax naengz rux aeu sowh saeh dwx nyeuz sowh saeh naeh jix hawj Lug lez, baenzaqnaeh hawj gaenqsu sawz taeuq. <sup>21</sup>Dez hoakrawz hawj puj tai daeuq zaeu, hawj paenqdix ndaej aen mingh, Lug goj dungzlumj, ngaiq aeu aen mingh hawj gawz zoq hawj gawz. <sup>22</sup>Dez mboq saenxpanq dij goanz, sowh saeh saenxpanq naeh dix haeuz aeu hawj Lug gvanx, <sup>23</sup>hoanx naeh dij goanz zaenzzungq Lug daj zaenzzungq Dez dungzlumj. Gawz mboq zaenzzungq Lug, zoq zawh mboq zaenzzungq Dez nemz dix daeuj naeh. <sup>24</sup>Gux haxdoq su swhlit, gawz biak kauq gux, goj sinq laux nemz gux daeuj naeh, gawz zoq ndaej aen mingh daengznauq. Dix mboq ndaej tw sowh gaenq hoakri hoak loang naeh, dix haeuz ni ka loh rux zoah tai naeh, daeq ka loh ndaej aen mingh naeh. <sup>25</sup>Gux haxdoq su swhlit, zaekgaj taeng zwz yah, gannaeh zoq zawh, puj tai ruxnyinz hiang lug zaiz dij Sen, gawz ruxnyinz gawz zoq zaeu yah. <sup>26</sup>Zoq baenzaq Dez ndaw fax zawh goaklaeg aen mingh, dix goj hawj Lug zaiz dix baenz goaklaeg aen mingh. <sup>27</sup>Goj cholaeng gux zawh goanz rongx

<sup>u</sup>5:10 Sw fahlih Moahciz laiz naeh hax Vaenz Cednoiq mboq jinx hoak gaengx. Puj saeq puj Yaeuhtaiq hax tw gaenq naek daeqloh goj suanq zawh hoak gaengx.

hoak Lug Dij Goanz naeh, dix zoq aeu sowh qenhliq saenxpanq naeh hawj gux. <sup>28</sup> Gaenqsu laek sawz zawh Lug dij Goanz saenxpanq dij goanz. Gaenq naeh naengz gajfa, zoq zawh taeng zwz maz, Lug dij Goanz rongx puj tai, paenqdix ruxnyinz hiang dix, <sup>29</sup> daengzle zoq og maz. Gawz hoak ndae, daeuq zaeu, ndaej aen mingh. Gawz hoak mbowq, daeuq zaeu, zoq haeggaj ndaej tw sowh gaenq hoakri hoak loang naeh.

<sup>30</sup> "Mboq zawh hax gux zawx hoakrawz zoq hoakrawz, zawh biak kauq laux nemz gux daeuj naeh hoak. Baenzaqnaeh, gux goj mboq rux haeggaj hoak gaeng, gux hoakzaqrawz ruxnyinz, gux zoq hoakzaqrawz saenxpanq. Baenzaqnaeh gaenq saenxpanq gux naeh zawh tw'piang. <sup>31</sup> Jixzawh zux miz gaj gux hax gux zawh gawz, daengz gux hax gux zawh gawz goj miz gaeng luq.<sup>v</sup> <sup>32</sup> Gaj naengz miz goanz ux hax gux zawh gawz, gux ruxndeq gaenq gaenqdix hax naeh zawh zaeh. <sup>33</sup> Gaenqsu ndaej nemz dij goanz mwz dih Yezhanq naeh, dix haeuz haxdoq su gux zawh gawz, gaenq gaenqdix hax naeh zawh zaeh. <sup>34</sup> Doiq gux maz hax, dij goanz hax gux zawh lug zaiz dij Sen, mboq miz gaeng jihzaq. Gaj gux laemh le gaemz Yezhanq hax naeh, zawh cholaeng hawj su ndaej jeuq. <sup>35</sup> Yezhanq daj aen daeng oq ux dungzlumj, gaenqsu venq zaemz gaenqrungh dix goanq. <sup>36</sup> Yezhanq goj hax gux zawh gawz, gaj naengz miz diauq ux hawj daenh ruxndeq gux zawh gawz singjringh. Diauq naeh zoq zawh sowh najgaengx Dez ndaw fax

hawj gux daeuj hoak naeh, zoq zawh sowh gaenq gux hoak naeh, hawj daengzle ruxndeq gux zawh Dez ndaw fax nemz daeuj. <sup>37</sup> Dez nemz gux daeuj inxnaeh, dix goj haeggaj hax gux zawh gawz. Hiang dix, gaenqsu mboq sanz ndaej ruxnyinz. Rangh dix, gaenqsu goj mboq sanz ndaej taen. <sup>38</sup> Kauq dix, gaenqsu goj mboq aeu nyaengxzaw. Baenzaqrawz gux ruxndeq mah? Zawh gaenqsu mboq sinq goanz dij Sen nemz daeuj naeh. <sup>39</sup> Gaenqsu caqsiq doag *Sw Dij Sen*, zawh su faeklah rux daeq ndaw *Sw Dij Sen* ndaej aen mingh daengznauq. Gaj bwnz *Sw Dij Sen* naeh lej zawh haxdoq daenh gux zawh gawz mbezneh. <sup>40</sup> Gaj gaenqsu mboq venq maz zawj gux ndaej aen mingh. <sup>41</sup> Gux mboq ceu najta dij goanz. <sup>42</sup> Gaj gaenqsu lej, gux ruxndeq zaw su mboq ngaiq dij Sen saek'i. <sup>43</sup> Gux daeuj inxnaeh zawh Dez gux yaix daeuj, zawh cho Dez daeuj mbezneh, gaj gaenqsu mboq zaemz gux. Jixzawh puj ndai mboq miz gawz yaix daeuj, zawh cho gaj hoakri daeuj, gaenqsu ej zaemz dix. <sup>44</sup> Gaenqsu gawz goj zaemz sowh najta daenh aeu hawj naeh, gaj gaenqsu mboq ceu sowh najta laux Sen doag doag aeu hawj naeh. Hoanx naeh su hoakzaqrawz sinq gux mux? <sup>45</sup> Vaenz saenxpanq naeh, mboq zawh hoakri gux yuq doqnaj Dez ndaw fax gauq su, goanz gauq su naeh zawh Moahciz, zawh goanz su maengx naeh. <sup>46</sup> Sowh sw Moahciz laiz naeh, laiz zoah gaenq gux, baenzaqnaeh, jixzawh gaenqsu sinq sowh sw Moahciz laiz naeh, jixzawh gaenqsu sinq zaeh, gaenqsu goj toj sinq gux mboqyaq.

<sup>v</sup>5:31 Sowh goizdingq naeh yuq Sw Fahlih Daih Ngih 19:15: "Jixzawh goanz rawz hax dix ndaej taen goanz rawz hoak loang, mboq baenz pinh gaj kauq dix zoq paeg goanz gaengnaeh hoak loang, hoakrawz goj song goanz rux sam goanz hax ndaej taen goanz rawz hoak loang, zoq paeg goanz gaeng naeh hoak loang baenz." Saeh ndae goj zawh hoakzaqnaeh paeg.

<sup>47</sup> Jixzawh gaenqsu mboq sinq sowh gaenq dix laiz naeh, gaenqsu hoakrawz sinq sowh kauq gux hax naeh mux?"

### Suanq Gaj Puj zaiz, Yezsuz Hawj

#### Haj Tiang Goanz Jin Imq

**6**<sup>1</sup> Gvaq ndauj ux yaq, Yezsuz kamj aen kow Zazliqliq mwz, aen kow naeh goj rongx hoak kow Tihbixlixyaq. <sup>2</sup> Miz yaengh boangx goanz dwx maz nowngz Yezsuz, zawh paenqdix ndaej taen sowh saenh saenh Yezsuz ya aen chaej dij goanz naeh. <sup>3</sup> Yezsuz kwnj mwz ndaw bo, daj cohsaenz dix zaemh naengh dih gaengnaeh. <sup>4</sup> Zwz gaengnaeh zaekgaj taeng jeng puj Yaeuhtaiq, Jeng Gvaq naeh. <sup>5</sup> Yezsuz ngangh to lez, leztaen miz yaengh boangx goanz daeq maz doq dix, zoq daj Faezliq hax: "Gaenqraeuz bae rawz swx binx maz hawj boangx goanz naeh jin nix?" <sup>6</sup> Yezsuz hax gaemz kauq naeh, zawh daeg zaw Faezliq, hoakri dix bwnz ruxndeq hoakzawz hoak. <sup>7</sup> Faezliq yaeng: "Daengz aeu song baeg *dowhna*<sup>w</sup> jenzngaenz bae swx binx, goanz ux jin ixux, naengz mboq doh mah." <sup>8</sup> Miz goanz cohsaenz ux, zoq zawh Anzdowhle, goanz nongx zaiz Cizmaenh Bihdowh naeh, dix daj Yezsuz hax: <sup>9</sup> "Inxnaeh miz maeng ux, laep haj aen sowh binx aeu kaeujmeg dwx hoak naeh,<sup>x</sup> song do bya, gaj aeu baen hawj goanz lai baenzaqnaeh, doh jij goanz jin ah?" <sup>10</sup> Yezsuz hax: "Yaix goanzlai naengh daeuj." Dih gaengnaeh miz nyaj lai taeuq,

goanzlai zoq naengh daeuj. Dij goanz dih naeh suanq gaj puj zaiz zoq miz teq haj tiang goanz ux naeh.

<sup>11</sup> Yezsuz aeu binx maz, mbaiq dij Sen, zoq aeu baen hawj sowh dij goanz naengh naeh, baen dij bya goj zawh hoakzaqnaeh, paenqdix jin ndaej gajrawz zoq aeu hawj gajrawz. <sup>12</sup> Paenqdix jin imq yaq, Yezsuz daj cohsaenz dix hax: "Zaep sowh gaenq low naeh maz, yaj langqfaeq." <sup>13</sup> Haj aen binx kaeujmeg byenqbaenz binx lai taeuq, paenqdix zoq bae zaep gaenq low, zoq zawh sowh gaenq goanzlai jin low naeh, zaep ndaej sipngih ka choiq. <sup>14</sup> Goanzlai leztaen sowh saenh yaengh saenh Yezsuz hoak naeh, zoq hax: "Goanz naeh toj zawh goanz zawxkauq dij Sen, toj zawh goanz Moahciz hax mwznaj rux daeuj dihndin naeh."\* <sup>15</sup> Yezsuz ruxndeq goanzlai daz gaemh dix hoak hongz, zoq goanzdoag daeuj dauh mwz ndaw bo.

#### Yezsuz Yuq Now Naemx Daeq

<sup>16</sup> Taeng zang'haemh maz, cohsaenz dix bae taeng haenz kow. <sup>17</sup> Fax haeuz ndaem, Yezsuz naengz mboq daeuj dih paenqdix naeh. Paenqdix kwnj mwz ndaw lowz, daz kamj mwz longq Zazbowhungh. <sup>18</sup> Ndaw kow hubhaeb miz laemz dwx, naemx ndaw kow fowd mbyoahmbyoah. <sup>19</sup> Cohsaenz dix uaij lowz teq ngih-haj-taeng-samsip *swztazdih* ux naeh,<sup>y</sup> leztaen Yezsuz yuq now naemx daeq, gaj laeng gaj maz zawj aen lowz, zoq mbu. <sup>20</sup> Gaj Yezsuz daj paenqdix hax: "Zawh gux, laek mbu." <sup>21</sup> Paenqdix

<sup>w</sup>6:7 Zwz naeh goanz puj hoak gaengx ux hoak gaengx vaenz ux zoq ndaej *dowhna* ngaenz ux.

<sup>x</sup>6:9 kaeujmeg dwx tuk nyeuz kaeujmeg ix, sowh kaeujmeg naeh zawh puj luk jin.

<sup>y</sup>6:19 Ngih-haj-taeng-samsip *swztazdih* gvae teq sip liz lai ux naeh.

\*6:14 Fahlih Ngih 18:15; 18.

zux cenq rongx dix mwz ndaw lowz, lowz zoq cenq mwz taeng dih paenqdix daz mwz naeh.

**Yezsuz Zawh Sowh Kaeuj  
Aeu Aen mingh Hawj Naeh**

<sup>22</sup> Vaenzlaeng, sowh goanzlai in yuq haenz kow baih gaengnaeh, leztaen zux miz aen lowz ix doag yuq dih gaengnaeh, goj ruxndeq Yezsuz mboq daj cohsaenz dix zaemh kwnj mwz ndaw lowz, zawh cohsaenz Yezsuz haeggaj bae. <sup>23</sup> Gaj miz jij aen lowz ix ux daeq Tihbixlixyaq chaenh maz, yuq zawj dih vaenzvaz Zaeuj mbaiq dij Sen yaq au binx baen hawj goanzlai jin naeh. <sup>24</sup> Goanzlai leztaen Yezsuz daj cohsaenz dix mboq yuq dihnaeh, zoq kwnj mwz ndaw lowz, mwz Zazbowhnungh cha Yezsuz. <sup>25</sup> Paenqdix mwz taeng doiqfaeg cha mex Yezsuz, zoq cham dix: "Lazbix, mawz maz taeng inxnaeh zwzrawz ah?" <sup>26</sup> Yezsuz yaeng: "Gux haxdoq su swhlit, gaenqsu cha gux, mboq zawh cholaeng gaenqsu ndaej taen sowh saeh ndaw fax naeh, zawh cholaeng gaj ruz dongx su naeuh. <sup>27</sup> Laek cholaeng gaj sowh gaenqjin rux naeuh naeh baeuh, cho sowh gaenqjin mboq rux naeuh naeh, sowh gaenqjin hawj aen mingh daengznauq naeh baeuh, zoq zawh sowh gaenq Lug Dij Goanz au hawj su naeh. Dez ndaw fax, dij Sen haeuz hax gux

zawh goanz dix lowg daeuj naeh,<sup>z</sup> hoakzaqnaeh gux rux au sowh gaenqjin naeh hawj su." <sup>28</sup> Goanzlai daeuq cham dix: "Gaenqpiu hoj hoak gaeng, zux suanq zawh hoak najgaengx dij Sen mux?" <sup>29</sup> Yezsuz yaeng: "Sinq goanz dij Sen nemz daeuj naeh, zoq zawh hoak najgaengx dij Sen." <sup>30</sup> Yaq paenqdix zoq hax: "Mawz hoak sowh saenh yaengh saenh sowh rawz, hawj piu lez yaq zoq sinq mawz mux? Mawz daz hoak gaenq rawz mux?" <sup>31</sup> Puj jeq rownz raeuz ndaej yuq ndaw doanghmowz jin *maznah*,<sup>a</sup> daj ndaw *Sw Dij Sen* mai naeh dungzlumj: 'Dix au gaenqjin daeq ndaw fax daeuj hawj paenqdix jin.'" <sup>b</sup> <sup>32</sup> Yezsuz daj paenqdix hax: "Gux haxdoq su swhlit, mboq zawh Moahciz au sowh gaenqjin daeq ndaw fax daeuj naeh hawj paenqdix, gaj gannaeh Dez gux au sowh gaenqjin zaeh, sowh gaenqjin daeq ndaw fax daeuj naeh hawj su. <sup>33</sup> Baenzaqrawz mah? Sowh gaenqjin dij Sen au hawj naeh zoq zawh goanz daeq ndaw fax daeuj, goanz au aen mingh hawj dij goanz dihndin naeh." <sup>34</sup> Paenqdix daj Yezsuz hax: "Cuh aj, daeq gannaeh mwz vanz mawz au sowh gaenqjin naeh, sowh kaeuj naeh, hawj piu." <sup>35</sup> Yezsuz daj paenqdix hax: "Hoakri gux zoq zawh sowh kaeuj au aen mingh hawj naeh, gawz maz zawj gux, toj mboq rux dongxyaeg. Gawz sinq gux, mboq rux yaegnaemx daengznauq. <sup>36</sup> Gaj

---

<sup>z</sup>6:27 Dij Sen tungzgoaq le gaenq naeh hawj daenh ruxndeq Yezsuz zawh lug zaiz dix, goanz dix lowg daeuj naeh: daih aet, Yezhanq goanz saeh daenh hoak diauq zauh soi q naeh naeh hax Yezsuz zawh lug zaiz dij Sen; daih ngih, zwz Yezsuz hoak diauq zauh soi q naeh naeh miz goanz lai leztaen Minghkoan dij Sen daj noagbiadhaeb dungzlumj loangz daeuj ndaw ndang Yezsuz; daih sam, dix hawj Yezsuz rux hoak sowh saeh saenh yaengh saenh naeh.

<sup>a</sup>6:31 *Maznah* zawh gaenqjin, zwzpujjeq dij Sen au hawj dij goanz Yixsowhleh jin. Zwz Moahciz zowz dij goanz Yixsowhleh ni Aizjih naeh, dij Sen vaenz vaenz hawj dihndin miz laeb ux mbang mbejmbej daj nyeq dungzlumj, zoq zawh *maznah*. *Maznah* daj faenz yenhciq dungzlumj, kau, jin van daj sowh binx au townqdoq daz naeh dungzlumj. Lez Sw Ni Aizjih 16:13-32.

<sup>b</sup>6:31 Gaenz kauq naeh haeuz yuq Sw Lownx 78:24, 104:40.

gux haeuz haxdoq su yaq, gaenqsu haeuz leztaen gux, gaj naengz mboq sinq. <sup>37</sup>Nanghgaj sowh dij goanz Dez ndaw fax aeu hawj gux naeh, toj maz zawj gux mboqyaq; nanghgaj gawz maz zawj gux, gux toj mboq rux viangh dix. <sup>38</sup>Baenzzaqrawz mah? Gux daeq ndaw fax daeuj, mboq zawh cholaeng tw'zaw hoakri hoak, zawh cholaeng tw'zaw laux nemz gux daeuj naeh hoak. <sup>39</sup>Laux nemz gux daeuj naeh sai'zaw dix zawh hoakzaqnaeh daz: sowh dij goanz dix aeu hawj gux naeh, gux daengz goanz ux naengz mboq hawj lamq, yaq vaenz now ndin mowd naeh naengz hawj paenqdix daeuq zaeu. <sup>40</sup>Baenzzaqrawz mah? Sai'zaw dez gux zawh hawj sowh dij goanz ruxnaj Lug yaq sinq naeh ndaej aen mingh daengznauq, yaq vaenz now ndin mowd naeh gux hawj paenqdix daeuq zaeu." <sup>41</sup>Puj Yaeuhtaiq mbangj goanz cholaeng Yezsuz hax: "Gux zawh sowh kaeuj daeq ndaw fax daeuj naeh," paenqdix zoq nyah dwk dix. <sup>42</sup>Paenqdix hax: "Dix zawh Yezsuz, goanz lug zaiz Yezsowh naeh naeujmax! Bohmeh dix raeuz goj ruxnaj naeuxmax? Gannaeh dix baenzzaqrawz hax 'Gux zawh daeq ndaw fax daeuj' mux?" <sup>43</sup>Yezsuz yaeng: "Gaenqsu laek hoakzaqnaeh nyah. <sup>44</sup>Sowh dij goanz maz zawj gux naeh, mboq zawh haeggaj rux maz ah, zawh Dez nemz gux daeuj naeh hawj paenqdix maz baenz mbyah. Gawz maz zawj gux, vaenz now ndin mowd naeh gux hawj dix daeuq zaeu. <sup>45</sup>Ndaw *Sw Dij Sen*, puj zawxkauq dij Sen hoakzaqnaeh mai: 'Mwznaj zawh dij Sen haeggaj zau daengzle paenqdix.'"<sup>c</sup> Yaq Yezsuz daeuq hax: "Nanghgaj gawz ruxnyinz Dez ndaw fax zau yaq goj ruxndeq naeh, toj maz zawj

gux. <sup>46</sup>Gaenq naeh mboq zawh hax miz dij goanz ndaej taen Dez ndaw fax. Mizgaj goanz daeq zawj dij Sen daeuj naeh ndaej taen Dez ndaw fax. <sup>47</sup>Gux haxdoq su swhlit, gawz sinq gux gawz zoq ndaej aen mingh daengznauq. <sup>48</sup>Gux zoq zawh sowh kaeuj hawj aen mingh naeh. <sup>49</sup>Puj jeq rownz su ndaej yuq ndaw doanghmowz jin *maznah*, gaj goj naengz tai. <sup>50</sup>Gaj sowh kaeuj daeq ndaw fax daeuj naeh dij goanz jin yaq zoq mboq rux tai. <sup>51</sup>Gux zoq zawh sowh kaeuj hawj aen mingh naeh, sowh kaeuj daeq ndaw fax daeuj naeh, jixzawh gawz jin sowh kaeuj naeh, zoq zaeu daengznauq mboqyaq. Sowh gaenq kaeuj gux aeu hawj naeh zoq zawh nowx gux, nowx gux zawh cholaeng jeuq aen mingh dij goanz dihndin hawj." <sup>52</sup>Yaq, puj Yaeuhtaiq mbangj goanz dungzjinj, hax: "Goanz naeh hoakzaqrawz aeu nowx dix hawj raeuz jin mux?" <sup>53</sup>Yezsuz daj paenqdix hax: "Gux haxdoq su swhlit, jixzawh gaenqsu mboq jin nowx Lug Dij Goanz, mboq ndut lowd Lug Dij Goanz, su zoq mboq miz aen mingh zaeh naeh. <sup>54–55</sup>Nowx gux zawh kaeuj zaeh, lowd gux zawh gaenqndut zaeh. Baenzzaqnaeh, gawz jin nowx gux, ndut lowd gux, gawz zoq ndaej aen mingh daengznauq, vaenz now ndin mowd naeh gux hawj dix daeuq zaeu. <sup>56</sup>Gawz jin nowx gux, ndut lowd gux, zoq yuq ndaw gux ndowj, gux goj yuq ndaw dix ndowj, gux zwzzwz daj dix zaemh yuq. <sup>57</sup>Dez gux zawh goaklaeg aen mingh naeh, dix nemz gux daeuj, gux goj zawh cho'mbaiq Dez zaeu. Baenznde, sowh dij goanz jin nowx gux naeh goj zawh cho'mbaiq gux zaeu. <sup>58</sup>Gaenqnaeh zoq zawh kaeuj daeq ndaw fax daeuj, mboq daj *maznah* dungzlumj, puj jeq rownz

<sup>c</sup>6:45 Gaenz kauq naeh naengz yuq Sw Yixsaiqyaq 54:13.

su jin *maznah* yaq, goj naengz tai. Gawz jin sowh kaeuj naeh toj zaeu mwz taeng daengznauq." <sup>59</sup> Suq kauq naeh zawh zwz Yezsuz yuq rownzndawcowq longq Zazbowhnungh zau daenh naeh hax.

### Sowh Kauq Hawj Dij Goanz Ndaej Aen Mingh Daengznauq Naeh

<sup>60</sup> Cohsaenz dix, miz goanz lai taeuq biak yaq, zoq hax: "Gaemz kauq naeh raix taeuq, miz gawz biak dix ndaej ah?" <sup>61</sup> Yezsuz ruxndeq cohsaenz dix cho mbaed saeh naeh mbuhmbih mbuhmbih, zoq daj paenqdix hax: "Gaemz kauq naeh hawj gaenqsu lez mboq ndaej gux maj?" <sup>62</sup> Jixzawh gaenqsu leztaen goanz rongx hoak Lug Dij Goanz naeh mwz taeng dih zwz nduq dix ndowj naeh, ej baenzrawz mawj? <sup>63</sup> Hawj dij goanz zaeu zawh minghkoan dij Sen, dij goanz hoakri mboq rux hawj hoakri zaeu. Sowh gaenq gaenqgux daj su hax naeh zawh gaemz kauq Minghkoan dij Sen, zawh aeu aen mingh hawj su. <sup>64</sup> Gaj gaenqsu miz dij goanz mboq sinq." Yezsuz hoakzaqnaeh hax zawh dix daeq zwzrawz maz haeuz bwnz ruxndeq sowh dij goanz mboq sinq naeh zawh gawz, goj ruxndeq goanz doaklaeng aeu dix kai hawj sowh dij goanz daj dix hoak dangq baih naeh, goj ruxndeq goanz naeh zawh gawz. <sup>65</sup> Yezsuz daeuq hax: "Baenzzaqnaeh, gux ndaej daj su hax yaq, sowh dij goanz maz zawj gux naeh, mboq zawh haeggaj rux maz ah, zawh Dez nemz gux daeuj naeh hawj paenqdix maz baenz mbyah." <sup>66</sup> Daeq mbaed naeh mwz, cohsaenz dix miz goanz lai taeuq

ni bae, mboq nowngz dix. <sup>67</sup> Yezsuz daj sipngih goanz cohsaenz dix hax: "Gaenqsu goj zawx ni bae vah?" <sup>68</sup> Cizmaenh-bihdowh yaeng: "Zaeuj aj, mawz miz sowh kauq hawj dij goanz ndaej aen mingh daengznauq naeh, gaenqpiu mboq nowngz mawz naengz bae nowngz gawz mah!" <sup>69</sup> Gaenqpiu haeuz sinq mawz, goj ruxndeq mawz zawh goanz sawrik, goanz dij Sen nemz daeuj naeh." <sup>70</sup> Yezsuz zoq yaeng paenqdix: "Gux mboq zawh lowg sipngih goanz su mawx? Gaj gaenqsu miz goanz ux mbowq taeuq, zawh daj do gvanx dij pi naeh zawh zaemh yowngx." <sup>71</sup> Yezsuz hax gaemz kauq naeh zawh hax Yaeuhdaq, goanz dij goanz Zazyoah, goanz lug zaiz Cizmaenh naeh. Goanz naeh hax lej hax zawh sipngih goanz dij goanz zawxkauq Yezsuz goanz ux, gaj doaklaeng dix aeu Yezsuz kai hawj sowh dij goanz daj Yezsuz hoak dangq baih naeh.

### Yezsuz Mwz Yezluqsaxlaengx Jin Jeng

**7** <sup>1</sup> Gvaq ndauj ux yaq, Yezsuz goj naengz gaj yuq ndaw mbanj Zazliqliq, dix bae longq bae longq. Dix ruxndeq puj saeq puj Yaeuhtaiq daz kaj dix. Baenzzaqnaeh dix zoq mboq zawx mwz ndaw mbanj Yaeuhdaq. <sup>2</sup> Zaekgaj taeng jeng puj Yaeuhtaiq Jeng Ndownj Zangjpungh naeh.<sup>d</sup> <sup>3</sup> Le nongx zaiz Yezsuz daj dix hax: "Mawz baenz ni inxnaeh mwz ndaw mbanj Yaeuhdaq, hoakzaqnaeh hawj cohsaenz mawz goj leztaen najgaengx mawz mah!" <sup>4</sup> Gawz zawx hawj zwz hoakri leuz bae dih bae dih, mboq miz gawz lupliamx hoak saeh. Jixzawh

<sup>d</sup>7:2 Zwz puj jeq puj Yixsowhleh yuq ndaw doanghmowz ndowj siqsiq jij bi, paenqdix yuq ndaw zangjpungh ndowj, doaklaeng paenqdix ndaej maz ndaw chaenh ndowj, paenqdix zoq jin *Jeng Ndownj Zangjpungh* naeh, jin jeng naeh hoak gaenq hawj hoakri laek lumz jeh yuq ndaw doanghmowz ndowj zangjpungh naeh. Lez Sw Liqvaeq 23:33-36, 39-43, Sw Fahlih Daih Ngih 16:13-15.



mawz naengz hoak sowh saeh naeh, zoq baenz aeu hoakri hawj dij goanz dawj fax leztaen mawz zawh gawz singjringh." <sup>5</sup> Le nongx zaiz dix hoakzaqnaeh hax, zoq zawh hax daengz gaj le nongx zaiz dix naengz mboq siq dixzawh Jizduz. <sup>6</sup> Yezsuz zoq daj paenqdix hax: "Zwz gux naengz mboq taeng. Gaj doiq su maz hax, lej zwzrawz gojndaej. <sup>7</sup> Dij goanz dihndin mboq rux hwnq su mah. Gaj paenqdix hwnq gux, unj gux hax sowh gaenq paenqdix hoak naeh zawh gaenq mboq. <sup>8</sup> Gaenqsu mwz jin'jeng ndeh, zwz gux naengz mboq taeng, baenzaqnaeh gannaeh gux mboq mwz jin'jeng naeh." <sup>9</sup> Yezsuz hax gaenqnaeh yaq, naengzgaj yuq ndaw Zazliqliq ndowj.

<sup>10</sup> Gaj le nongx zaiz dix mwz jin'jeng yaq, dix goj zaemh mwz Yezluqsaxlaengx chaenh jin'jeng, mboq zawh daeq doqnaj doqta goanzlai mwz, zawh lupliamx mwz. <sup>11</sup> Le vaenz jin'jeng naeh, puj saeq puj Yaeuhtaiq cha Yezsuz, hax: "Goanz gaengnaeh yuq rawz mux?" <sup>12</sup> Goanzlai laemh dix nyauznyauz, mbangj goanz hax: "Dix zawh puj ndae." Mbangj goanz hax: "Mboq zawh, dix zawh yai goanzlai naeuj." <sup>13</sup> Paenqdix mbu puj saeq puj Yaeuhtaiq, baenzaqnaeh mboq miz gawz yuq doqnaj doqta goanzlai laemh dix. <sup>14</sup> Jin'jeng jin ndaej mbengj ux yaq, Yezsuz mwz rownz dij Sen zau daenh. <sup>15</sup> Puj saeq Yaeuhtaiq sawz taeuq hax: "Goanz naeh mboq sanz ndaej hawj lauxswz zau, dix baenzaqrawz ruxndeq ndaw *Sw Dij Sen* lai baenzaqnaeh mux?" <sup>16</sup> Yezsuz zoq hoakzaqnaeh yaeng paenqdix: "Sowh

gaenq gux zau naeh mboq zawh gaenq hoakri gux, zawh gaenq laux nemz gux daeuj naeh. <sup>17</sup> Jixzawh gawz venq biak sowh gaenq dij Sen yaix hoak naeh, gawz zoq ruxndeq sowh gaenq gux zau naeh zawh daeq dij Sen daeuj, rux zawh gux haeggaj pinh hoakri gux hax. <sup>18</sup> Sowh dij goanz haeggaj pinh hoakri hax naeh, zawh cholaeng najta hoakri. Gaj sowh dij goanz miz dij goanz nemz daeuj naeh mboq zawh cholaeng najta hoakri, zawh cholaeng najta laux nemz dix daeuj naeh, mizgaj sowh goanz naeh zux hax zaeh, zaw dix zux mboq miz gaenqndog. <sup>19</sup> Moahciz aeu fahliahawj su, gaj gaenqsu mboq miz saek goanz biak daengz buq fahliahawj dix. Gaenqsu baenzaqrawz daz kaj gux mux?" <sup>20</sup> Goanzlai yaeng: "Gawz daz kaj mawz ah! Mawz lau zoah dij pi mwz ndang mbezmbogleq?" <sup>21</sup> Yezsuz yaeng: "Gux hoak diauq ux, gaenqsu ej sawz. <sup>22</sup> Daeq zwzpujjeq maz, fahliahawj Moahciz zau su hoak diauq zauh heh naeh. Laemh zaeh maz, gaenqsu goj ruxndeq, diauq zauh heh naeh mboq zawh daeq zwz Moahciz naeh zauh, haeuz zauh deg zwz puj jeq rownz raeuz maz. Baenzaqnaeh, hax le hax zawh Vaenz Cednoiq, gaj gaenqsu goj saeh lug zaiz su hoak diauq zauh heh naeh." <sup>23</sup> Gaenqsu cholaeng biak fahliahawj Moahciz daengz zawh Vaenz Cednoiq gaenqsu goj saeh daenh hoak diauq zauh heh naeh, haenx, gux yuq Vaenz Cednoiq hawj daengz ndang goanz ux ndae, gaenqsu zoq jih dwk gux max?" <sup>24</sup> Hax gaenq rawz zawh ndae, gaenq rawz zawh ndog, mboq baenz lez baihnog, hax

<sup>e7:22</sup> Zwzpujjeq, dij Sen hawj Yaqboahlazhanq daj puj zaiz ndaw rownz dix heh naeg dij noag, hoakzaqnaeh zawh aeu mai hoak dij goanz dij Sen. Daeklaeng, dix hawj Moahciz aeu gaenq naeh laiz nyaengx ndaw sw, dix saengq puj Yixsowhleh hoak gaenq naeh. Lez Sw Zwz nduq 17:10-14; Sw Liqvaeq 12:3.

dix zawh gaenq ndae, raj hax dix zawh gaenq ndog, baenz lez dix zawh hoj raj mboq hoj."

### Goanz Naeh Zawh Jizduz Wx

<sup>25</sup> Dij goanz ndaw Yezluqsaxlaengx miz dij goanz hax: "Goanz naeh mboq zawh goanz puj saeq Yaeuhtaiq raeuz daz kaj naeh mawx?" <sup>26</sup> Mawz lez, dix yuq doqnaj doqta goanzlai zau daenh, puj saeq raeuz goj mboq daeuj hax dix gaemz rawz maznoax. Lau puj saeq ruxndeq dix zawh Jizduz zaeh max? <sup>27</sup> Gaj raeuz ruxndeq goanz naeh zawh daeq rawz maz, gaj Jizduz daeuj zwzrawz, lej mboq miz gawz ruxndeq dix daeq rawz maz neh." <sup>28</sup> Zwz naeh, Yezsuz yuq gumhhongh Rownz dij Sen zau daenh, dix caqsiq hax: "Gaenqsu ruxnaj gux, goj ruxndeq gux daeq rawz maz. Gux mboq zawh pinh hoakri gux haeggaj daeuj, zawh miz laux ux nemz gux daeuj. Laux nemz gux daeuj naeh zawh dij Sen jing, gaj gaenqsu mboq ruxndeq zaw dix. <sup>29</sup> Gaj hoakri gux ruxndeq zaw dix, baenzaqrawz mah? Gux zawh daeq zawj dix daeuj, goj zawh dix nemz gux daeuj." <sup>30</sup> Yezsuz hoanx naeh hax, mbangjgoanz zoq jih taeuq daz gaep dix, gaj zwz dix naengz mboq taeng, zoq gawz goj mboq chaeg. <sup>31</sup> Gaj dih goanzlai naeh miz goanz lai taeuq sinq dix zawh Jizduz, paenqdix goanz lej hax mwz doq goanz: "Goanz naeh hoak sowh saeh saenh yaengh saenh lai baenzaqnaeh, dix toj zawh Jizduz mboqyaq, jixmboqzawh mboq miz gawz rux hoak sowh saeh saenh yaengh saenh lai baenzaqnaeh."

### Miz Dij Goanz Daz Maz Gaep Yezsuz

<sup>32</sup> Dij goanz Fahliqsaiq ruxnyinz goanzlai hoakzaqnaeh laemh Yezsuz, paenq goanz gvanx puj mbud dij Sen naeh daj dij goanz Fahliqsaiq zoq nemz sowh puj dawz du rownz dij Sen naeh mwz gaep Yezsuz. <sup>33</sup> Yaq Yezsuz zoq hax: "Gux daj su zaemh yuq mboq miz jij gau yah, gux dauh mwz zawj laux nemz gux daeuj naeh. <sup>34</sup> Mwznaj gaenqsu cha gux, gaj cha mboq taen. Dih gux yuq naeh, gaenqsu mwz mboq baenz." <sup>35</sup> Puj saeq puj Yaeuhtaiq goanz lej hax mwz doq goanz: "Goanz naeh daz mwz rawz hawj raeuz cha mboq taen dix mux? Lau dix daz ni inxnaeh bae goh ndai sowh dih miz puj Yaeuhtaiq ndowj naeh, zau sowh puj goak kauq Cizlah naeh maj? <sup>36</sup> Dix hax 'Mwznaj gaenqsu cha gux, gaj cha mboq taen. Dih gux yuq naeh, gaenqsu mwz mboq baenz.' Gaemz kauq naeh zawh hax gaeng mux?"

### Sowh Naemx Hawj Dij Goanz

#### Ndaej Aen mingh Naeh

<sup>37</sup> Jeng Ndowj Zangipungh vaenz doaklaeng naeh, zoq zawh vaenz zungqyauq nyeuz daengzle naeh, Yezsuz in, caqsiq hax: "Gawz yaegnaemx, gawz zoq maz zawj gux ndut ndeh. <sup>38</sup> Daj ndaw *Sw Dij Sen* laemh sowh puj sinq gux naeh dungzlumj: 'Mwznaj ka dah miz sowh naemx hawj aen mingh naeh daeq ndaw zaw dix lae daeuj uad'uad.'" <sup>39</sup> Yezsuz hax gaemz kauq naeh zawh hax sowh puj sinq dix naeh mwznaj rux ndaej Minghkoan dij Sen. Gaj zwz naeh Dez ndaw fax naengzbaeq hawj Yezsuz miz

\*7:38 Saxzazliqyaq 14:8; Yixsaiqyaq 44:3; 55:1; Yixcizjeh 47.

najta, baenzzaqnaeh Dez ndaw fax naengzbaeq aeu Minghkoan dix hawj puj sinq Yezsuz naeh.

### Goanzlai Cholaeng Yezsuz Dungzjinj

<sup>40</sup>Goanzlai ruxnyinz gaemz kauq naeh yaq, mbangj goanz zoq hax: "Goanz naeh zawh goanz puj zawxkauq dij Sen gaengnaeh zaeh."

<sup>41</sup>Goj miz goanz hax: "Dix zawh Jizduz." Gaj miz dij goanz hax: "Jizduz hoakzaqrawz zawh daeq mbanj Zazliqliq maz ah?" <sup>42</sup>Ndaw *Sw Dij Sen* mboq zawh hoakzaqnaeh hax mawx: 'Jizduz zawh luglan Daqvaeq, zawh daeq longq Bozliqhaenh dih goakrownz Daqvaeq naeh maz.'" <sup>43</sup>Goanzlai cholaeng Yezsuz hoakzaqnaeh dungzjinj. <sup>44</sup>Paenqdix miz dij goanz daz gaep Yezsuz, gaj mboq miz gawz chaeg.

### Puj saeq Puj Yaeuhtaiq Mboq Sinq Yezsuz

<sup>45</sup>Sowh goanz gvanx puj mbud dij Sen naeh daj dij goanz Fahliqsaiq leztaen sowh puj dawz baegdu rownz dij Sen naeh dauh maz, paenqdix zoq cham sowh puj dawzdu naeh: "Gaenqsu baenzzaqrawz mboq zowz dix maz mawj?" <sup>46</sup>Pujdawzdu yaeng: "Mboq sanz ndaej biak gawz hoakzaq dix naeh laemh!" <sup>47</sup>Dij goanz Fahliqsaiq hax sowh puj dawzdu naeh: "Gaenqsu goj zoah dix yai maj?" <sup>48</sup>Puj saeq daj dij goanz Fahliqsaiq miz saek goanz sinq dix wx?" <sup>49</sup>Yaq puj Fahliqsaiq daeuq daj sowh puj dawzdu naeh hax: "Gux haxdoq su, paenq goanzlai yuq haenz Yezsuzbiak naeh, paenqdix mboq ruxndeq fahlih, paenqdix toj zoah

dij Sen fah mboqyaq." <sup>50</sup>Puj Fahliqsaiq miz goanz ux rongx hoak Nihgozdowhmuq, zoq zawh goanz koax daekgoanq mwz taen Yezsuz naeh, goanz naeh daj puj Fahliqsaiq hax: <sup>51</sup>"Paeg saeh gawz gojndae, naengz mboq ndaej biak baeg ndiang dix hax, naengz mboq ruxndeq dix ndaej mboq ndaej hoak zaeh, nganq fahlih maz hax, raeuz rux hax dix hoak loang gaeng maj?" <sup>52</sup>Puj Fahliqsaiq yaeng: "Mawz goj zawh daeq ndaw mbanj Zazliqliq maz wx? Mawz caqsiq lez *Sw Dij Sen* zoq ruxndeq Zazliqliq mboq rux miz puj zawxkauq dij Sen."

[*Sw Dij Sen* sowh bwnz ndowj nyeuz naeh mboq miz 7:53 – 8:11.]

### Yah Daj Puj zaiz Zaemhnoanz

#### Zoah Daenh Jenj Zoah Naeh

<sup>53</sup>[[Yaq dangq goanz dangq dauh mwz rownz, **8**<sup>1</sup>Yaq dangq goanz dangq dauh mwz rownz, gaj Yezsuz mwz Bo Maeghit. <sup>2</sup>Fax zaekgaj rungh maz, dix daeuq dauh mwz gumhhongh rownz dij Sen, daengzle daeuq maz dih dix naeh, dix zoq naengh daeuj, zau paenqdix. <sup>3</sup>Sowh lauxswz zau *Sw Dij Sen* naeh daj dij goanz Fahliqsaiq zowz maz yah ux, gau yah naeh naengh laux ndai naeh zoah daenh jenj zoah. Paenqdix yaix yah naeh in jinghzang, <sup>4</sup>zoq daj Yezsuz hax: "Lauxswz, gau yah naeh naengh laux ndai naeh zoah daenh jenj zoah. <sup>5</sup>Fahlih Moahciz yaix raeuz aeu tin saeuh sowh yah naeh tai, mawz hoakrawz hax mux?"<sup>f</sup> <sup>6</sup>Paenqdix hax gaemz naeh zawh ciqzaw Yezsuz, daz cha saek yowngh gauq dix. Gaj Yezsuz gaeuz raengx dix,

<sup>f</sup>8:5 Sowh fahlih naeh yuq *Sw Liqvaeq* 20:10, *Sw Fahlih Daih Ngih* 22:22-24, gaj fahlih goj hax baenz hawj sowh goanz puj zaiz gaengnaeh tai.

aeu neuvmungz yuq dihndin laiz sw. <sup>7</sup> Paenqdix goq cham cham dix, dix zoq ed raengx dix, daj paenqdix hax: "Gaenqsu gawz mboq miz gaenqloang, gawz zoq aeu tin saeuh dix daekgoanq." <sup>8</sup> Yaq dix daeuq gaeuz raengx dix, aeu neuvmungz yuq dihndin laiz sw. <sup>9</sup> Paenqdix ruxnyinz gaemz kauq naeh yaq, daeq puj jeq goq daeuj daeuj, hoak goanz hoak goanz og bae, low gaj Yezsuz, yah gaengnaeh naengz yuq dih gaengnaeh in. <sup>10</sup> Yezsuz ed raengx dix maz, cham yah gaengnaeh: "Paenqdix yuq rawz ah? Mboq miz saek goanz ganz hax mawz hoak loang hoj tai maj?" <sup>11</sup> Yah gaengnaeh hax: "Zaeuj aj, mboq miz." Yezsuz hax: "Gux goj mboq hax mawz hoj tai gah. Bae ndeh, daeq gannaeh mwz laek daeuq hoak loang tem mbeh."]]

### **Yezsuz Zawh Gaenq Rungh Dij Goanz Dihndin**

<sup>12</sup> Yezsuz daeuq daj goanzlai hax: "Gux zawh gaenqrungh dij goanz dihndin, gawz nowngz gux hoak cohsaenz gux, toj mboq ndaej yuq dih ndaem daeq, naengz ndaej sowh gaenqrungh hawj dij goanz ndaej aen mingh naeh." <sup>13</sup> Dij goanz Fahliqsaiq daj dix hax: "Hoakri mawz haeggaj hax mawz zawh gawz, gaenq mawz hax naeh mboq suanq zawh zaeh." <sup>14</sup> Yezsuz yaeng: "Hoakri gux ruxndeq gux daeq rawz daeuj, mwz rawz. Baenzzaqnaeh, daengz gaenqgux haeggaj hax gaenqgux zawh gawz, gaenq gaenqgux hax naeh goj suanq zawh zaeh. Gaj gaenqsu mboq ruxndeq gux daeq rawz daeuj, mwz rawz. <sup>15</sup> Gaenqsu hax dij goanz hoak loang zawh lez gaj baihnog, gaj gaenq gux mboq hax

dij goanz hoak loang. <sup>16</sup> Daengz gux hax dij goanz hoak loang, gaenq gux hax naeh goj hoj mboqyaq. Unj, gux mboq zawh goanz doag haeggaj hax, zawh daj Dez nemz gux daeuj naeh zaemh hax. <sup>17</sup> Fahlih su hoakzaqnaeh hax, miz song goanz hax ndaej taen raj hax ndaej ruxnyinz zux suanq zawh zaeh. <sup>18</sup> Daih aet gux haeggaj saeh hoakri haxdoq daenh gux zawh gawz, daih ngih, Dez nemz gux daeuj naeh goj saeh gux haxdoq daenh gux zawh gawz." <sup>19</sup> Paenqdix cham: "Dez mawz yuq rawz ah?" Yezsuz yaeng: "Gaenqsu mboq ruxndeq zaw gux, goj mboq ruxndeq zaw Dez gux. Jixzawh gaenqsu ruxndeq zaw gux, zoq goj ruxndeq zaw Dez gux." <sup>20</sup> Suq kauq naeh zawh zwz Yezsuz yuq gumhhongh rownz dij Sen zau daenh naeh hax, zawh yuq haenz gowh aeu nyaengx sowh ngaenzjenz daenh aeu hawj dij Sen naeh hax. Gaj zwz naeh naengz mboq taeng zwz dix, baenzzaqnaeh mboq miz gawz goangz dix.

<sup>21</sup> Yezsuz daeuq daj paenqdix hax: "Gux mwz yah, mwznaj gaenqsu cha gux, yaq gaenqsu tai, gaenq hoakloang su goj naengz mboq ndaej yangq. Dih gux mwz naeh, gaenqsu mwz mboq baenz." <sup>22</sup> Yaq puj saeq puj Yaeuhtaiq hax: "Dix hax: 'Dih gux mwz naeh, gaenqsu mwz mboq baenz.' Lau dix daz haeggaj hawj hoakri tai max?" <sup>23</sup> Yezsuz hax: "Gaenqsu zawh daeq dihndin maz, gaj gaenqgux zawh daeq ndaw fax daeuj. Gaenqsu zawh gaenq dawj fax, gaj gaenqgux mboq zawh gaenq dawj fax. <sup>24</sup> Baenzzaqnaeh gux daj gaenqsu hax, mwznaj gaenqsu tai, gaenq hoakloang su goj naengz mboq ndaej yangq. Jixzawh gaenqsu mboq sinq gux

zawh Laux gaengnaeh,<sup>g</sup> mwznaj gaenqsu zoq tai, gaenq hoakloang su goj naengz mboq ndaej yangq."

<sup>25</sup> Paenqdix zoq cham: "Mawz zawh gawz?" Yezsuz hax: "Daeq zwz rawz maz gux haeuz bwnz haxdoq su. <sup>26</sup> Gux miz lai yowngh taeuq hwt gaenqsu, hax gaenqsu hoak loang gaeng. Gux haxdoq su, Laux nemz gux daeuj naeh dix hax gaeng goj hax zaeh mboqyaq, gux yuq zawj dix ruxnyinz gaeng, gux zoq haxdoq dij goanz dihndin." <sup>27</sup> Paenqdix mboq ruxndeq Yezsuz zawh laemh Dez ndaw fax. <sup>28</sup> Baenzaqnaeh Yezsuz hax: "Gaenqsu yaeuj goanz rongx hoak Lug Dij Goanz naeh yaq,<sup>h</sup> toj ruxndeq gux zoq zawh Laux gaengnaeh, goj ruxndeq mboq zawh hoakri gux haeggaj hoak gaeng. Dez ndaw fax hoakzaqrawz zau gux, gux zoq hoakzaqrawz laemh. <sup>29</sup> Laux nemz gux daeuj naeh daj gux zaemh yuq, gux zwzzwz hoak sowh saeh dix zaemz naeh, baenzaqnaeh dix mboq viangh gux, mboq hawj gux goanzdoag haeggaj yuq." <sup>30</sup> Gau Yezsuz hax le gaemz kauq naeh, zoq miz goanz lai taeuq sinq dix.

### Kauqjing Toj Hawj Su Hoakkoij Gah

<sup>31</sup> Yezsuz daj puj Yaeuhtaiq sowh puj sinq dix naeh hax: "Jixzawh gaenqsu goq goq biak sowh gaenq gux zau su naeh bae hoak, gaenqsu zoq zawh cohsaenz gux zaeh eh. <sup>32</sup> Gaenqsu toj ruxndeq kauqjing, kauqjing toj hawj su hoakkoij gah." <sup>33</sup> Paenqdix hax: "Gaenqpiu zawh luglan Yaqboahlazhanq, mboq sanz zoah gawz aeu

hoakkoij, mawz baenzaqrawz hax: 'Gaenqsu toj hoakkoij gah' mux?"

<sup>34</sup> Yezsuz hax: "Gux haxdoq su swhlit, gawz hoak loang gawz zoq suanq zawh puj koj gaenq hoakloang. <sup>35</sup> Puj koj mboq ndaej yuq rownz zaeuj dix ndowj daengznauq, mizgaj lug zaiz zux ndaej yuq daengznauq. <sup>36</sup> Baenzaqnaeh, jixzawh lug zaiz dij Sen hawj gaenqsu hoakkoij gah, gaenqsu zoq mboq zawh puj koj eh. <sup>37</sup> Gux ruxndeq gaenqsu zawh luglan Yaqboahlazhanq. Gaj zaw su mboq zaemz kauq gux, baenzaqnaeh gaenqsu daz kaj gux. <sup>38</sup> Sowh gaenq gux laemh naeh, zawh gux yuq zawj Dez gux taen. Gaj sowh gaenq su hoak naeh, zawh ruxnyinz zawj dez su maz."

<sup>39</sup> Paenqdix hax: "Dez mawz, dez piu wznaex? Puj jeq rownz piu zawh Yaqboahlazhanq, mawz mboq ruxndeq max?" Yezsuz hax: "Jixzawh gaenqsu zawh luglan Yaqboahlazhanq zaeh, toj hoak sowh saeh Yaqboahlazhanq hoak naeh mboqyaq. <sup>40</sup> Gux aeu sowh kauq gux ruxnyinz daeq zawj dez gux naeh, sowh kauq jing naeh haxdoq su, gaj gannaeh gaenqsu daz kaj gux. Yaqboahlazhanq mboq sanz hoak sowh saeh naeh. <sup>41</sup> Sowh gaenq su hoak naeh zawh gaenq dez su hoak." Paenqdix hax: "Gaenqpiu mboq zawh lugdangz. Gaenqpiu zux miz goanz dez doag, zoq zawh dij Sen." <sup>42</sup> Yezsuz hax: "Gux zawh daeq zawj dij Sen daeuj, jixzawh dij Sen zawh dez su, gaenqsu toj ngaiq gux mboqyaq. Gux haeuz daeuj inxnaeh, gux mboq zawh haeggaj daeuj, zawh

<sup>g</sup>8:24 Gaemz kauq naeh yuq Sw Yixsaiqyaq 43:10. *Laux gaengnaeh* mbaednduq bwnz zawh hax *Yez'hoahhuah*, minxzw hawj Sen. Yezsuz hoakzaqnaeh hax zoq zawh hax hoakri dix zawh dij Sen.

<sup>h</sup>8:28 Yezsuz hax gaemz kauq naeh: *Gaenqsu yaeuj goanz rongx hoak Lug dij Goanz naeh*, dix zawh hax paenqdix mwznaj aeu dix lamh mwz maexngamzchaz tai.

dij Sen nemz gux daeuj. <sup>43</sup>Kauq gux kaeuj chu su mboq ndaej, gaenqsu zoq mboq ruxndeq kauq gux zawh hax gaeng. <sup>44</sup>Dez su zawh do gvanx dij pi naeh naeh, su daj dez su dungzlumj, dez su nwh gaeng, gaenqsu goj zaemh hoak gaeng. Daeq zwzrawz maz dix zoq zawh puj kaj goanz. Zaw dix mboq miz yowngh rawz jing, baenzzaqnaeh dix mboq sanz hax zaeh. Dix bwnz zawh puj haxyai, goj zawh dez puj haxyai. Baenzzaqnaeh haxyai zawh gaenqdix bwnz baenz. <sup>45</sup>Gux aeu kauqjing haxdoq su, gaenqsu zoq cho gaenqnaeh mboq sinq gux. <sup>46</sup>Gux mboq sanz hoak loang gaeng, gaenqsu mboq miz gawz miz zaenqjiq hax gux hoak loang gaeng. Gux aeu kauqjing haxdoq su, gaenqsu baenzzaqrawz mboq sinq gux mux? <sup>47</sup>Gawz zawh dij goanz dij Sen, gawz zoq biak kauq dij Sen mboqyaq. Gaenqsu mboq biak, unj gaenqsu mboq zawh dij goanz dij Sen."

### Naengz Mboq Miz Yaqboahlazhanq

#### Haeuz Bwnz Miz Yezsuz

<sup>48</sup>Puj saeq puj Yaeuhtaiq daj Yezsuz hax: "Gaenqpiu hax mawz zawh dij goanz Saxmaxliqyaq, yaq naengz zoah dij pi mwz ndang, biak kauq dij pi, gaemz kauq naeh mboq loang saek'i zaeh." <sup>49</sup>Yezsuz yaeng: "Gux mboq zawh zoah dij pi mwz ndang. Gux zaenzzungq Dez gux, gaj gaenqsu mboq zaenzzungq gux. <sup>50</sup>Gux mboq zawh cho najta hoakri, gaj miz laux ux zawh hawj gux miz najta, hax gux hoak hoj. <sup>51</sup>Gux haxdoq su swhlit, gawz biak kauq gux, zoq mboq rux tai, taengdeg daengznauq." <sup>52</sup>Puj saeq puj Yaeuhtaiq daj dix hax: "Gannaeh gaenqpiu ruxndeq mawz

zoah dij pi mwz ndang zaeh yah. Yaqboahlazhanq haeuz tai yaq, daengzle puj zawxkauq dij Sen goj haeuz tai yaq, mawz naengz hax: 'Jixzawh gawz biak kauq gux, zoq mboq tai daengznauq.' <sup>53</sup>Mawz naengz dwx nyeuz puj jeq rownz piu Yaqboahlazhanq maj? Dix tai yaq, daengzle puj zawxkauq dij Sen goj tai yaq. Mawz faeklaih mawz zawh gawz ah?" <sup>54</sup>Yezsuz yaeng: "Jixzawh gux zawh cholaeng hawj hoakri miz najta, najta gux zoq mboq suanq zawh gaeng; laux hawj gux miz najta naeh zawh Dez gux, Dez gux zoq zawh laux su hax zawh dij Sen su naeh. <sup>55</sup>Gaj gaenqsu mboq ruxndeq zaw dix, gux lej ruxndeq zaw dix. Jixzawh gux hax gux mboq ruxndeq zaw dix, gux zoq daj su dungzlumj zawh haxyai. Gaj gux ruxndeq zaw dix, goj biak kauq dix. <sup>56</sup>Puj jeq rownz su Yaqboahlazhanq, dix nwh taeng ndauj gux naeh dix zoq faengz, doaklaeng zwz dix leztaen naeh, dix zoq faengz taeuq." <sup>57</sup>Puj saeq puj Yaeuhtaiq daj dix hax: "Mawz daengz hajsip bi naengz mboq ndaej, hoakrawz ndaej taen Yaqboahlazhanq mux?" <sup>58</sup>Yezsuz hax: "Gux haxdoq su swhlit, naengz mboq miz Yaqboahlazhanq, gux haeuz bwnz miz yaq yah." <sup>59</sup>Yaq, paenqdix zoq zaep tin daz saeuh dix, gaj Yezsuz ni gumhhongh rownz dij Sen, lamq mwz rawz mwz.

#### Yezsuz Ya Goanz Ta'mbud Ux Ndae

**9** <sup>1</sup>Gau Yezsuz daeq loh naeh, dix leztaen goanz ta'mbud ux, goanz naeh zowngx daeuj zoq bwnz ta'mbud. <sup>2</sup>Cohsaenz Yezsuz cham Yezsuz: "Lazbix, goanz naeh zowngx daeuj zoq ta'mbud, zawh gawz hoak loang mux? Zawh dix rux zawh

bohmeb dix mux?" <sup>3</sup>Yezsuz yaeng: "Mboq zawh cholaeng dix hoak loang, goj mboq zawh cholaeng bohmeb dix hoak loang, zawh cholaeng dij Sen daz ya dix hawj daenh leztaen doakriangz dwx dij Sen. <sup>4</sup>Gannaeh naengz rungh, naengz zawh zang'vaenz. Gaenqraeuz baenz hoak najgaengx laux nemz gux daeuj naeh. Fax ndaem maz, zoq mboq miz gawz hoak najgaengx baenz eh. <sup>5</sup>Zwz gux yuq dihndin naeh, gux zoq zawh gaenqrungh dihndin." <sup>6</sup>Hax gaemz kauq naeh, dix zoq pih naemxnaiz bae dihndin, aeu naemxnaiz daj namh daz mwz ta goanz ta'mbud naeh, <sup>7</sup>daj goanz ta'mbud naeh hax: "Mawz bae vaengz naemx Cizloahyaq naeh soiq ndeh." Yaq goanz ta'mbud naeh zoq bae, soiq yaq, dauh maz zoq leztaen. Laemh aen minxzwh Cizloahyaq naeh zawh hax: "Zoah nemz daeuj."

<sup>8</sup>Sowh dij goanz ruxnaj dix naeh daj sowh dij goanz kwnz leztaen dix dexkaeuj naeh hax: "Goanz naeh mboq zawh goanz zwzwwz naengh dexkaeuj naeh mawx?" <sup>9</sup>Mbangj goanz hax: "Zawh dix zaeh." Mbangj goanz hax: "Mboq zawh gah, gaj lumj dix." Hoakri dix haeggaj hax: "Zawh gux." <sup>10</sup>Paenqdix zoq cham dix: "Ta mawz hoakzawz rux leztaen ah?" <sup>11</sup>Dix yaeng: "Miz goanz ux rongx hoak Yezsuz, dix jenj namh daz ta gux, daj gux hax: 'Mawz bae vaengz naemx Cizloahyaq naeh soiq ndeh.' Gux daeh bae soiq, zoq leztaen eh." <sup>12</sup>Paenqdix hax: "Goanz gaengnaeh yuq rawz ah?" Dix hax: "Gux mboq ruxndeq."

<sup>13</sup>Paenqdix zoq zowz goanz mbaednduq ta'mbud naeh mwz dih dij goanz Fahliqsaiq naeh. <sup>14</sup>Vaenz Yezsuz jenj namh daz ta dix naeh zawh Vaenz Cednoi. <sup>15</sup>Dij goanz Fahliqsaiq goj cham dix

hoakzawz leztaen baenz. Dix daj paenqdix hax: "Goanz gaengnaeh aeu namh daz ta gux, gux daeh soiq, zoq leztaen." <sup>16</sup>Dij goanz Fahliqsaiq mbangj goanz hax: "Goanz gaengnaeh mboq gaem Vaenz Cednoi, baenzzaqnaeh dix mboq zawh dij goanz dij Sen." Mbangj goanz hax: "Goanz hoak loang ux hoakrawz rux hoak sowh saeh ndaw fax naeh mux?" Paenqdix zoq dungzjinj. <sup>17</sup>Yaq paenqdix daeuj daj goanz mbaednduq ta'mbud naeh hax: "Goanz gaengnaeh hawj ta mawz rux leztaen, mawz hax dix zawh dij goanz gaeng?" Goanz mbaednduq ta mbud naeh yaeng: "Zawh puj zawxkauq dij Sen."

<sup>18</sup>Puj saeq puj Yaeuhtaiq mboq sinq dix koax daekgoanq zawh puj ta'mbud, mboq sinq zawh gannaeh zux rux leztaen. Paenqdix zoq rongx bohmeb dix daeuj, <sup>19</sup>cham paenqdix: "Su hax su miz goanz lug zaiz ux zowngx daeuj zoq bwnz ta'mbud, zawh goanz naeh mbyah? Haenx, gannaeh baenzzaqrawz rux leztaen mawj?" <sup>20</sup>Bohmeb dix yaeng: "Dix zawh lug zaiz piu, zowngx daeuj zoq ta'mbud, gaenqnaeh piu ruxndeq. <sup>21</sup>Gannaeh dix hoakrawz rux leztaen, gaenqpiu mboq ruxndeq. Gawz hawj ta dix rux leztaen, gaenqpiu goj mboq ruxndeq. Gaenqsu cham dix mah, dix haeuz baenz pujdwx, dix haeggaj rux hax." <sup>22</sup>Bohmeb goanz mbaednduq ta'mbud naeh hoakzawz hax zawh mbu puj saeq puj Yaeuhtaiq. Puj saeq puj Yaeuhtaiq haeuz dwkgangz ndae'ndowq, gawz yinq Yezsuz hoak Jizduz, zoq daem gawz ni rownzndawcowq, mwznaj mboq jinx maz rownzndawcowq. <sup>23</sup>Baenzzaqnaeh bohmeb dix hax: "Dix haeuz baenz pujdwx, gaenqsu cham dix mah."

<sup>24</sup> Yaq dij goanz Fahliqsaiq mbaed daih ngih rongx goanz koax daekgoanq ta'mbud naeh maz, daj dix hax: "Mawz hoj biangz dij Sen.<sup>i</sup> Gaenqpiu ruxndeq goanz gaengnaeh zawh puj hoak loang."  
<sup>25</sup> Dix yaeng: "Dix zawh mboq zawh puj hoak loang, gux mboq ruxndeq; gaj miz diauq ux gux ruxndeq, zoq zawh mbaednduq gux zawh puj ta'mbud, gannaeh gux rux leztaen."  
<sup>26</sup> Paenqdix zoq cham: "Dix hoak gaeng bae doq mawz mux? Dix hoakrawz hawj ta mawz rux leztaen mux?"  
<sup>27</sup> Dix yaeng: "Gux haeuz haxdoq su, gaj gaenqsu mboq biak, gannaeh baenzaqrawz daeuq zawx biak mawj? Lau gaenqsu goj zawx hoak cohsaenz dix mboq loah?"  
<sup>28</sup> Paenqdix zoq mang dix: "Mawz zux zawh cohsaenz dix naeuj, gaenqpiu zawh cohsaenz Moahciz."  
<sup>29</sup> Gaenqpiu ruxndeq dij Sen ndaej daj Moahciz hax kauq. Gaj goanz gaengnaeh, gaenqpiu mboq ruxndeq dix daeq rawz maz."  
<sup>30</sup> Dix daj paenqdix hax: "Zawx ko gaiq eh, goanz gaengnaeh hawj ta gux rux leztaen, gaenqsu naengz mboq ruxndeq dix daeq rawz maz."  
<sup>31</sup> Gaenqraeuz gawz goj ruxndeq dij Sen mboq biak puj hoak loang vanz, dix biak gaj sowh puj ruxndeq mbu dix, sowh puj biak kauq dix bae hoak naeh."  
<sup>32</sup> Daeq chauq fax daj dihndin maz, mboq sanz ruxnyinz gawz rux hawj ta sowh puj zowngx daeuj zoq ta'mbud naeh rux leztaen."  
<sup>33</sup> Jixzawh goanz gaengnaeh mboq zawh daeq dij Sen daeuj, dix gaeng goj mboq rux hoak."  
<sup>34</sup> Paenqdix hax: "Mawz daeq zowngx daeuj zoq

zawh puj hoak loang dwx singjringh, naengz daz zau piu maj?" Yaq paenqdix zoq daem dix og nog.

<sup>35</sup> Yezsuz ruxnyinz paenqdix daem dix og nog, doaklaeng cha mex dix, Yezsuz zoq daj dix hax: "Mawz sinq Lug Dij Goanz vah?"  
<sup>36</sup> Dix hax: "Zaeuj aj, gawz zawh Lug Dij Goanz, mawz haxdoq gux, gux zux sinq dix baenz."  
<sup>37</sup> Yezsuz hax: "Mawz haeuz leztaen dix, goanz gannaeh daj mawz hax kauq naeh zoq zawh dix."  
<sup>38</sup> Dix hax: "Zaeuj aj, gux sinq!" Dix zoq gvih bae doq Yezsuz.  
<sup>39</sup> Yezsuz hax: "Gux daeuj dihndin zawh cholaeng saenxpanq, hawj sowh puj lez mboq taen naeh rux leztaen, hawj sowh puj leztaen naeh ta'mbud."  
<sup>40</sup> Miz jij goanz puj Fahliqsaiq ux yuq haenz dix ruxnyinz gaenqnaeh, zoq hax: "Mawz mboq zawh hax daengz gaenqpiu goj zawh puj ta'mbud naeujbojleh?"  
<sup>41</sup> Yezsuz daj paenqdix hax: "Jixzawh gaenqsu zawh puj ta'mbud, gaenq hoakloang su zoq mboq miz yah. Gaj gannaeh gaenqsu hax gaenqsu mboq zawh puj ta'mbud, baenzaqnaeh gaenqsu naengz miz gaenqloang."

### Yezsuz Zawh Puj dawzmbej Ndae

**10**<sup>1</sup> Yezsuz daeuq hax: "Gux haxdoq su swhlit, gawz mwz langh dij mbej, mboq zawh daeq baegdu mwz, zawh benz dihndai mwz, goanz naeh zoq zawh puj laek."  
<sup>2</sup> Gawz daeq baegdu ndonj mwz, gawz zux zawh puj dawz dij mbej.  
<sup>3</sup> Goanz dawz du naeh aj du hawj dix, dij mbej goj ruxnyinz hiang dix. Dix rongx minxzwh dij mbej hoakri, rongx hoak do hoak do, lingz paenqdix

<sup>19:24</sup> Yuq inxnaeh, *Mawz hoj biangz dij Sen*, goj ingj rux zawh hax: *Mawz yuq doqnaj dij Sen hoj hax swh*, rux hax: *Mawz hoj biangz dij Sen, mboq hoj biangz goanz naeh*.

<sup>19:39</sup> Inxnaeh hax *leztaenzawh hax ruxndeq kauq jing*, hax *ta'mbudzawh hax mboq ruxndeq kauq jing*.



og daeuj. <sup>4</sup>Dix lingz dij mbej hoakri og daeuj yaq, dix zoq daeq daekgoanq dij mbej. Dij mbej ruxndeq zawh hiang dix, baenzaqnaeh dij mbej goj nowngzlaeng dix. <sup>5</sup>Dij mbej mboq rux biak hiang puj mawq, baenzaqnaeh dij mbej mboq rux nowngzlaeng puj mawq, mizgaj luq lenh ni." <sup>6</sup>Yezsuz aeu aen bixliq naeh koanx dwk paenqdix, gaj paenqdix mboq ruxndeq gaenq dix hax naeh zawh hax gaeng.

<sup>7</sup>Baenzaqnaeh Yezsuz daeuq daj paenqdix hax: "Gux haxdoq su swhlit, gux zoq zawh baegdu dij mbej. <sup>8</sup>Gawz maz daekgoanq gux, gawz zoq zawh puj laek, gaj dij mbej mboq biak paenqdix. <sup>9</sup>Gux zoq zawh baegdu, nanghgaj gawz zawh ndonj gux mwz, gawz zoq ndaej jeuq mboqyaq, yaq bae'dauh vangqdangh, ndaej yuq dih miz nyaj zax. <sup>10</sup>Pujlaek maz, toj zawh maz laek, maz kaj, maz vaih. Gaenggux maz, zawh hawj dij mbej ndaej aen mingh, hawj aen mingh paenqdix daemdw. <sup>11</sup>Gux zawh puj dawzmbej ndae, puj dawzmbej ndae venq cholaeng dij mbej viangh aen mingh. <sup>12</sup>Sowh puj mboq zawh puj dawzmbej, gaj zawh lugriangz naeh, dij mbej goj mboq zawh gaenq hoakri dix, dix leztaen ma'naez daeuj, dix zoq jizzaz dij mbej, lenh gowx. Ma'naez goangz dij mbej, hawj dij mbej daengzle dungzbyaeg nauq. <sup>13</sup>Dix zawh lugriangz, dix mboq aeu dij mbej nyaengxzaw, baenzaqnaeh dix zoq lenh gowx. <sup>14</sup>Gux zawh puj dawzmbej ndae, gux ruxndeq zaw dij mbej gux, dij mbej gux goj ruxndeq zaw gux, <sup>15</sup>daj Dez ruxndeq zaw gux, gux goj ruxndeq zaw dix dungzljumj. Yaq gux naengz rux

cholaeng dij mbej viangh aen mingh. <sup>16</sup>Gux naengz miz dij mbej ndai tem, mboq zawh dij mbej langh naeh. Gux baenz lingz paenqdix daeuj, paenqdix goj rux biak hiang gux mboqyaq. Yaq dij mbej gux daengzle hoak boangx ndeu, daengzle zux miz goanz dawzmbej doag. <sup>17</sup>Zawh gux haeggaj viangh aen mingh, baenzaqnaeh Dez ngaiq gux; gux haeggaj viangh aen mingh, zawh cholaeng daeuq aeu dauh maz. <sup>18</sup>Mboq miz gawz aeu aen mingh gux ndaej, zawh gux haeggaj viangh. Gaenqnaeh zawh Dez gux yaix gux hoak. Gux miz qenhliq viangh, gux goj miz qenhliq aeu dauh maz." <sup>19</sup>Puj Yaeuhtaiq cholaeng suq kauq naeh daeuq dungzjinj. <sup>20</sup>Paenqdix miz goanz lai taeuq hax: "Dix zoah dij pi mwz ndang yah, dix baenzbaeg yah. Baenzaqrawz biak dix mux?" <sup>21</sup>Goj miz dij goanz hax: "Suq kauq dix hax naeh mboq zawh sowh puj zoah dij pi mwz ndang naeh hax. Dij pi hoakrawz rux hawj puj ta'mbud leztaen mux?"

### Puj Yaeuhtaiq Viangh Yezsuz

<sup>22</sup>Yuq ndaw Yezluqsaxlaengx, taeng jeng rongx hoak Jeng Zoih rownz dij Sen naeh,<sup>k</sup> zwz naeh zawh zwzgoangj. <sup>23</sup>Yezsuz yuq gumhhongh rownz dij Sen daeq, dix gvaq aen yauj rongx hoak aen yauj Soaxloahmaenh naeh. <sup>24</sup>Puj saeq puj Yaeuhtaiq homx maz haenz dix, daj dix hax: "Mawz daz hawj piu am mawz taeng zwzrawz mux? Jixzawh mawz zawh Jizduz, mawz zoq haxdoq piu swhlit." <sup>25</sup>Yezsuz daj paenqdix hax: "Gux haeuz haxdoq su, gaj su mboq sinq. Sowh saeh Dez gux nemz

<sup>k</sup>10:22 *Jeng Zoih Rownz dij Sen* zawh jeng long puj Yaeuhtaiq jeng ux, jin jeng naeh paenqdix gaj rownz gaj diamj daeng biad vaenz dungzdam.

gux hoak naeh haxdoq daenh gux zawh gawz.  
<sup>26</sup> Gaj gaenqsu mboq zawh boangx mbej gux,  
 baenzaqnaeh gaenqsu zoq mboq sinq. <sup>27</sup> Dij mbej  
 gux biak hiang gux, gux goj ruxndeq zaw paenqdix,  
 paenqdix goj nowngz gux. <sup>28</sup> Gux aeu aen mingh  
 daengznauq naeh hawj paenqdix, paenqdix mboq  
 rux lown, taengdiak daengznauq, gawz goj longx  
 paenqdix daeq ndaw mungz gux bae mboq baenz.  
<sup>29</sup> Dez aeu dij mbej hawj gux naeh dwx nyeuz  
 daengzle nauq, goj mboq miz gawz longx paenqdix  
 daeq ndaw mungz dez gux bae baenz. <sup>30</sup> Gux daj Dez  
 bwnz zawh goanz ndeu."

<sup>31</sup> Puj saeq puj Yaeuhtaiq daeuq zaep tin daz saeuh  
 dix. <sup>32</sup> Yezsuz daj paenqdix hax: "Gux hoak sowh  
 saeh ndae Dez nemz gux hoak naeh hawj su lez  
 lai baenzaqnaeh, gaenqsu cho yowngh rawz aeu  
 tin saeuh gux mux?" <sup>33</sup> Puj saeq puj Yaeuhtaiq daj  
 dix hax: "Gaenqpiu mboq zawh cholaeng saeh ndae  
 aeu tin saeuh mawz, zawh cholaeng mawz hoak  
 loang dij Sen, mawz gaenqyumq aeu hoakri hoak  
 dij Sen. Mawz goj zawh dij goanz naeujmax, gaj  
 mawz aeu hoakri hoak dij Sen." <sup>34</sup> Yezsuz hax:  
 "Su goj ruxndeq *Sw Dij Sen* hoakzaqnaeh laiz:  
 'Dij Sen ndaej hax, gaenqsu zawh boangx sen ux.'<sup>1</sup>  
<sup>35</sup> Gaenqsu goj ruxndeq sowh kauq ndaw *Sw Dij Sen*  
 hax naeh mboq rux byenq daengznauq. Daengzgaj  
 sowh dij goanz ruxnyinz kauq dix hax naeh, dij  
 Sen naengz rongx paenqdix hoak boangx sen ux.  
<sup>36</sup> Jixzawh dij Sen rongx paenq goanz naeh hoak  
 boangx sen ux mboq zawh hoak loang, haenx, gux  
 zawh goanz dij Sen lowg naeh, goanz dij Sen nemz  
 daeuj dihndin naeh, gux haeggaj rongx hoakri hoak

lug zaiz dij Sen, gaenqsu naengz hax gux zawh hoak  
 loang dij Sen maj? <sup>37</sup> Jixzawh gux mboq hoak sowh  
 saeh Dez nemz gux hoak naeh, gaenqsu zoq laek sinq  
 gux. <sup>38</sup> Jixzawh gux hoak sowh saeh Dez nemz gux  
 hoak naeh, daengz gaenqsu mboq sinq gux, su goj  
 baenz sinq sowh gaenq gux hoak naeh. Hoakzaqnaeh  
 hawj su nwh taeng, hawj su ruxndeq Dez gux yuq  
 ndaw gux, gux goj yuq ndaw Dez gux." <sup>39</sup> Paenqdix  
 daeuq daz gaep dix, gaj dix daeq mungz paenqdix  
 gowx ni. <sup>40</sup> Yezsuz daeuq bae ka dah Yezdanq baih  
 gaengnaeh, bae dih koax daekgoanq Yezhanq saeh  
 daenh hoak diauq zauh soiq naeh, yuq dihnaeh  
 ndowj. <sup>41</sup> Miz goanz lai taeuq bae dih dix naeh,  
 paenqdix hax: "Hax le hax Yezhanq mboq sanz hoak  
 sowh saeh ndaw fax naeh yowngh rawz, gaj sowh  
 gaenq Yezhanq hax goanz naeh, gaemz rawz goj  
 zawh zaeh mbezleh." <sup>42</sup> Yuq dih gaengnaeh, zoq miz  
 goanz lai taeuq sinq Yezsuz.

### Lazsazluq Tai

**11** <sup>1</sup> Miz goanz puj chaej ux, minxzwh rongx  
 hoak Lazsazluq, dix zawh dij goanz ndaw  
 Boahdaqnih, song goanz jex dix Maxliqyaq daj  
 Maxdaq yuq longq naeh ndowj. <sup>2</sup> Laemh goanz  
 Maxliqyaq naeh zoq zawh goanz doaklaeng aeu  
 sowh yuzsaw hom yaengh hom naeh daz din Zaeuj,  
 yaq naengz aeu koanto dix jiat din Zaeuj kawq  
 naeh. Lazsazluq goanz nongx zaiz paenqdix naeh  
 baenzchaej. <sup>3</sup> Maxliqyaq daj Maxdaq nemz dij goanz  
 bae dih Yezsuz naeh haxdoq Yezsuz: "Zaeuj aj,  
 goanz mawz nwh naeh baenzchaej yah." <sup>4</sup> Yezsuz  
 ruxnyinz, zoq hax: "Aen chaej naeh mboq rux hawj

<sup>1</sup>10:34 Gaemz kauq naeh yuq Sw Lownx 82:6.

dix tai daengznauq, zawh hawj daenh leztaen najta dij Sen. Dij Sen aeu aen chaej naeh hawj daenh leztaen lug zaiz dix miz najta."

<sup>5</sup> Yezsuz daeq zwzrawz maz bwnz nwh Maxdaq, Maxliqyaq, Lazsazluq. <sup>6</sup> Baenzaqnaeh dix ruxnyinz Lazsazluq baenzchaej, naengz yuq dih gaeuq dix ndowj naeh ndowj song vaenz. <sup>7</sup> Doaklaeng dix daj cohsaenz dix hax: "Gaenqraeuz daeuq mwz mbanj Yaeuhdaq eh." <sup>8</sup> Cohsaenz dix hax: "Lazbix, vaenzranz naeh puj saeq puj Yaeuhtaiq daz aeu tin saeuh mawz, mawz naengz mwz dih naeh maj?" <sup>9</sup> Yezsuz hax: "Zang'vaenz mboq zawh miz sipngih aen zungztaeuh maj? Jixzawh dij goanz zang'vaenz daeq loh, dix leztaen gaenqrungh dawj fax naeh, dix zoq mboq rux faedlaemx. <sup>10</sup> Jixzawh dij goanz zang'hwnz daeq loh, ndaw hoakri dix mboq miz gaenqrungh, dix toj faedlaemx mboqyaq." <sup>11</sup> Yezsuz hax gaemz kauq naeh yaq, dix daeuq daj paenqdix hax: "Dungzbownh raeuz Lazsazluq noanzlaep, gux mwz byoak dix." <sup>12</sup> Cohsaenz dix hax: "Zaeuj aj, jixzawh dix zawh noanzlaep, zoq rux daeuq ndae maz." <sup>13</sup> Yezsuz hax gaemz naeh zawh hax Lazsazluq haeuz tai yaq, gaj cohsaenz dix faeklah dix zawh hax noanzlaep zaeu. <sup>14</sup> Yaq Yezsuz zoq haxdoq paenqdix swhlit: "Lazsazluq haeuz tai yaq yaj. <sup>15</sup> Gux mboq yuq dih Lazsazluq naeh, zawh cholaeng hawj su gajfa sinq gux baenz, baenzaqnaeh gux how su zaemz. Gannaeh gaenqraeuz mwz dih dix naeh eh." <sup>16</sup> Dozmax goanz rongx hoak Lugsoah naeh, daj cohsaenz ndai hax: "Dix hax mwz, venj mbeh'ej, gaenqraeuz goj daj dix zaemh mwz tai eh."

### **Zawh Yezsuz Hawj Dij Goanz Daeuq Zaeu, Zawh Dix Aeu Aen Mingh Hawj Dij Goanz**

<sup>17</sup> Yezsuz mwz taeng longq Boahdaqnih, zoq ruxndeq Lazsazluq haeuz nyaengx ndaw ngomz mohbujreuh ndaej siq vaenz. <sup>18</sup> Laemh longq Boahdaqnih naeh daj Yezluqsaxlaengx chaenh dungzliq mboq gvae lai, miz teq siphaj *swztazdih* ux naeh.<sup>m</sup> <sup>19</sup> Puj Yaeuhtaiq miz goanz lai taeuq daeuj lez Maxdaq daj Maxliqyaq, nongx zaiz doiq naeh mboq miz, paenqdix daeuj byongz doiq naeh. <sup>20</sup> Maxdaq ruxnyinz Yezsuz maz, zoq bae raep dix, gaj Maxliqyaq naengz yuq ndaw rownz naengh. <sup>21</sup> Maxdaq daj Yezsuz hax: "Zaeuj aj, jixzawh mawz maz taeng inxnaeh zaeux tem, nongx zaiz gux zoq mboq rux tai eh. <sup>22</sup> Daengz gannaeh, gux goj ruxndeq, daengz mawz daj dij Sen vanz gaeng, dix goj hawj mawz mboqyaq." <sup>23</sup> Yezsuz hax: "Nongx zaiz mawz daeuq zaeu mboqyaq." <sup>24</sup> Maxdaq hax: "Gux ruxndeq taeng vaenz now ndin mowd, vaenz hawj dij goanz daeuq zaeu naeh zwzrawz, dix toj daeuq zaeu." <sup>25</sup> Yezsuz hax: "Zawh gux hawj dij goanz daeuq zaeu, zawh gux aeu aen mingh hawj dij goanz. Sowh puj sinq gux naeh, daengz tai yaq, goj rux daeuq zaeu mboqyaq. <sup>26</sup> Sowh dij goanz naengz zaeu sinq gux naeh, toj mboq rux tai daengznauq. Mawz sinq gaemz kauq naeh vah?" <sup>27</sup> Maxdaq hax: "Zaeuj aj, zawh lox, gux sinq mawz zawh Jizduz, zawh lug zaiz dij Sen, zawh goanz dij Sen ndaej hax toj rux daeuj dihndin naeh."

<sup>m</sup>11:18 Siphaj *swztazdih* gvae teq cho liz ux naeh.

### Yeysuz Haej

<sup>28</sup> Maxdaq hax suq kauq naeh yaq, zoq dauh mwz rongx nongx nyingz dix Maxliqyaq, dix lupliamx daj nongx dix hax: "Lauxswz maz yah, dix rongx mawz." <sup>29</sup> Maxliqyaq ruxnyinz, cenq dwnq maz, bae dih Yeysuz naeh. <sup>30</sup> Gau gaengnaeh, Yeysuz naengz mboq ndonj maz ndaw longq, naengzgaj yuq dih Maxdaq bae raep dix naeh. <sup>31</sup> Sowh puj Yaeuhtaiq daeuj rownz Maxliqyaq byongz Maxliqyaq naeh, leztaen Maxliqyaq gajbaeuh-gajbeh og nog, zoq nowngzlaeng dix bae, faeklahi dix bae dih ngomz mohbujreuh naeh haej. <sup>32</sup> Maxliqyaq bae taeng dih Yeysuz naeh, dix leztaen Yeysuz, zoq gvih bae doqnaj Yeysuz, hax: "Zaeuj aj, jixzawh mawz maz taeng inxnaeh zaeux tem, nongx zaiz gux zoq mboq rux tai eh." <sup>33</sup> Yeysuz leztaen dix haej, goj leztaen sowh puj Yaeuhtaiq daj Maxliqyaq zaemh daeuj naeh haej, ndaw zaw dix zoq jih taeuq, daengz ndaeng saemj nauq, <sup>34</sup> zoq hax: "Gaenqsu aeu dix mwz nyaengx rawz ah?" Paenqdix hax: "Zaeuj aj, mawz daj piu zaemh mwz lez." <sup>35</sup> Yeysuz haej. <sup>36</sup> Puj Yaeuhtaiq zoq hax: "Mawz lez, dix nwh goanz naeh baenzaqnaeh." <sup>37</sup> Gaj paenqdix miz goanz hax: "Daengz puj ta'mbud dix naengz rux daeuq hawj leztaen, dix laek hawj goanz naeh tai mboq baenz maj?"

### Lazsazluq Daeuq Zaeu

<sup>38</sup> Yeysuz daeuq jih taeuq, maz taeng baihnaj mohbujreuh. Aen mohbujreuh naeh zawh aen ngomz

ux, baeg ngomz miz kvaix tin ux dingz. <sup>39</sup> Yeysuz hax: "Ngex kvaix tin naeh ni." Maxdaq, jex goanz tai naeh, daj dix hax: "Zaeuj aj, dix haeuz mboq miz ndaej siq vaenz yaj, ndang dix toj maennaeh mboqyaq." <sup>40</sup> Yeysuz yaeng dix: "Gux mboq ndaej daj mawz hax yaq mawx 'Jixzawh mawz siq, zoq leztaen dij Sen miz najta baenzaqrawz mboqyaq.'" <sup>41</sup> Yaq paenqdix ngex kvaix tin gaengnaeh ni. Yeysuz ngangh to lez mwz ndaw fax, hax: "Dez aj, gux mbaiq mawz, unj mawz haeuz biak gux daj mawz hax kauq. <sup>42</sup> Gux le dauq ruxndeq mawz zwzzwz biak gux daj mawz hax kauq naeujoax, gaj gux yuq doqnaj boangx goanz in yuq haenz naeh hoakzaqnaeh mbaiq mawz zawh cholaeng hawj paenqdix siq gux zawh mawz nemz daeuj." <sup>43</sup> Hax gaemz kauq naeh yaq, zoq caqsiq rongx: "Lazsazluq, og daeuj!" <sup>44</sup> Goanz puj tai gaengnaeh zoq og daeuj, mungz dix daj ka dix miz paeng toq, naj dix miz jiatnaj toq. Yeysuz hax: "Hih paeng ndaw ndang dix ni, hawj dix daeq!"

### Dij Goanz Ndaw Hoiq Puj Yaeuhtaiq Dwkgangz

<sup>45</sup> Sowh puj Yaeuhtaiq maz lez Maxliqyaq naeh, miz goanz lai taeuq, leztaen sowh saeh Yeysuz hoak naeh, zoq siq Yeysuz. <sup>46</sup> Gaj paenqdix goj miz dij goanz bae dih dij goanz Fahliqsaiq naeh, aeu sowh saeh Yeysuz hoak naeh haxdoq paenqdix. <sup>47</sup> Yaq sowh goanz gvanx puj mbud dij Sen naeh daj dij goanz Fahliqsaiq zoq rongx daengzle dij goanz ndaw hoiq puj Yaeuhtaiq <sup>a</sup>maz dwkgangz, paenqdix hax: "Goanz naeh hoak sowh saeh ndaw fax naeh

---

<sup>a</sup>11:47 *Dij Goanz Ndaw Hoiq Puj Yaeuhtaiq* zawh puj Yaeuhtaiq, paenqdix gvanx puj Yaeuhtaiq hoakri, puj Yaeuhtaiq miz gaeng saeh zawh hawj paenqdix paeg.

lai taeuq, gaenqraeuz hoakzaqrawz hoak mux?  
<sup>48</sup>Jixzawh gaenqraeuz jizzaz dix hoakzaqnaeh,  
 gawz goj sinq dix. Dij goanz Loahmax zoq daeuj  
 longx rownz dij Sen raeuz, longx puj Yaeuhtaiq  
 raeuz." <sup>49</sup>Gaj paenqdix miz goanz ux rongx hoak  
 Gaizyaqfah, bi gaengnaeh zawh goanz naeh hoak  
 puj mbud dij Sen goanz saeq dwx nyeuz daengzle  
 naeh. Goanz naeh daj paenqdix hax: "Gaenqsu  
 gaeng goj mboq ruxndeq, <sup>50</sup>goj mboq nwh, goanz  
 ux daeb goanzlai tai, mboq hawj sowh dij goanz  
 hoakri naeh lown, gaenqnaeh doiq su ndae." <sup>51</sup>Dix  
 hoakzaqnaeh hax gaemz kauq naeh, mboq zawh  
 hoakri dix haeggaj nwh taeng, zawh bi gaengnaeh  
 dix hoak puj mbud dij Sen goanz saeq dwx nyeuz  
 daengzle naeh, baenzzaqnaeh dij Sen hawj dix hax  
 mwznaj Yezsuz rux daeb puj Yaeuhtaiq tai. <sup>52</sup>Yezsuz  
 mboq zawh cho gaj puj Yaeuhtaiq tai, goj zawh  
 cho puj yowngh ndai tai, nanghgaj zawh lug dij  
 Sen puj gaeng gojndae, yuq dungzgvae gajrawz goj  
 rongx maz zaemh yuq, hoak boangx ndeu. <sup>53</sup>Daeq  
 vaenz gaengnaeh maz, paenqdix zoq dwkgangz  
 kaj Yezsuz. <sup>54</sup>Baenzzaqnaeh, Yezsuz mboq yuq  
 mbanj Yaeuhdaq naeh yuq doqnaj doqta daenh  
 hoak gaeng. Dix ni dih gaengnaeh, bae aen chaenh  
 rongx hoak Yixfahleah naeh, dix daj cohsaenz  
 dix yuq aen chaenh naeh ndowj, aen chaenh naeh  
 yuq haenz doanghmowz. <sup>55</sup>Zaekgaj taeng Jeng puj  
 Yaeuhtaiq Jeng Gvaq naeh. Naengz mboq taeng  
 Jeng, miz goanz lai taeuq daeq ka'mowngz mwz  
 Yezluqsaxlaengx chaenh, mwz dih naeh hoak sowh  
 gaengz zauh hawj hoakri saw naeh. <sup>56</sup>Paenqdix yuq  
 ndaw Yezluqsaxlaengx cha Yezsuz, gau paenqdix

yuq rownz dij Sen in naeh, goanz lej daj goanz  
 hax: "Gaenqsu hoakzaqrawz nwh mux? Dix mboq  
 maz jin'jeng naeujbojleh?" <sup>57</sup>Sowh goanz gvanx puj  
 mbud dij Sen naeh daj dij goanz Fahliqsaiq haeuz  
 ndaej yaix daenh, jixzawh miz gawz ruxndeq Yezsuz  
 yuq rawz, zoq maz haxdoq paenqdix, hoakzaqnaeh  
 paenqdix zoq bae gaep dix.

### Maxliqyaq Aeu Sowh Yuzsaw Hom

#### Yowngh Hom Naeh Daz Din Yezsuz

**12** <sup>1</sup>Daekgoanq Jeng Gvaq choak vaenz,  
 Yezsuz mwz longq Boahdaqnih naeh, zoq  
 zawh longq Lazsazluq goanz Yezsuz hawj dix  
 daeuq zaeu naeh. <sup>2</sup>Miz dij goanz yuq dih naeh  
 qingj Yezsuz mwz jinkauej. Maxdaq goj mwz kvej,  
 Lazsazluq daj puj ndai daj Yezsuz zaemh naengh  
 zongz jinkauej. <sup>3</sup>Maxliqyaq aeu gaen yuzsaw hom  
 yaengh hom ux maz, ndaw yuzsaw miz sowh *nahdah*  
 biangz taeuq naeh dwk. Dix aeu gaeng naeh daz  
 din Yezsuz, daeuq aeu koanto hoakri dix bae jiat.  
 Ndaw rownz mizgaj sowh yai hom naeh. <sup>4</sup>Cohsaenz  
 Yezsuz Yaeuhdaq, goanz dij goanz Zazyoah, goanz  
 doaklaeng aeu Yezsuz kai hawj sowh puj daj Yezsuz  
 hoak dangqbaih naeh, <sup>5</sup>dix hax: "Baenzzaqrawz  
 mboq aeu gaenghom naeh kai sam baeg downnah<sup>o</sup>  
 yaq aeu saeh puj luk mux?" <sup>6</sup>Dix hax gaemz kauq  
 naeh, mboq zawh dix nwh puj luk zaeh, zawh dix  
 zawh puj laek, dix gaem jenz cohsaenz Yezsuz, kwnz  
 jin jenz daengzle. <sup>7</sup>Yezsuz hax: "Laek hax dix, dix  
 hoakzaqnaeh hoak zawh hoak nyaengx vaenz aeu  
 gux moak naeh. <sup>8</sup>Bae'naj, gaenqsu lej mboq ndaej

<sup>o</sup>12:5 Zwz naeh goanz puj hoak gaengx ux hoak gaengx vaenz ux zoq ndaej downnah ngaenz ux.

daj gux zaemh yuq, gaj gaenqsu saeh puj baenzluk lej naengz miz jizhoiq lai."

<sup>9</sup> Puj Yaeuhtaiq miz yaengh boangx dwx ruxnyinz Yezsuz yuq Boahdaqnih, paenqdix zoq maz, gaj paenqdix mboq zawh cho gaj Yezsuz, paenqdix goj maz lez Lazsazluq, goanz tai yaq Yezsuz hawj daeuq zaeu naeh. <sup>10–11</sup> Puj Yaeuhtaiq miz goanz lai taeuq, cholaeng Lazsazluq, paenqdix mboq nowngz sowh goanz gvanx puj mbud dij Sen naeh, maz sinq Yezsuz. Baenzzaqnaeh sowh goanz gvanx puj mbud dij Sen naeh, paenqdix dwkgangz daz kaj daengz Lazsazluq.

**Yezsuz Mwz Yezluqsaxlaengx,  
Goanzlai Daeuj Raep Dix**

<sup>12</sup> Vaenzlaeng, sowh puj haeuz mwz Yezluqsaxlaengx jin'jeng naeh miz goanz raengh taeuq, paenqdix ruxnyinz hax Yezsuz zaekgaj maz taeng Yezluqsaxlaengx, <sup>13</sup> zoq gaem ngah maexmba'baet bae raep dix, paenqdix caqsiq rongx:

"*Hoahsanxnah!*"<sup>P</sup>

Ngwz dij Sen gumx goanz dij Sen nemz daeuj naeh!<sup>q</sup>

Ngwz dij Sen gumx laux hongz Yixsowhle!"

<sup>14</sup> Yezsuz cha ndaej do dij loix ex ux, zoq kviq mwz now dix, daj ndaw *Sw Dij Sen* mai naeh dungzlumj, ndaw *Sw Dij Sen* hax:

<sup>15</sup> "Dij goanz ndaw Ciz'anz aj,<sup>r</sup> laek mbu.

Su lez, laux hongz su kviq dij loix ex maz yah."\*

<sup>16</sup> Mbaednduq cohsaenz Yezsuz mboq ruxndeq le gaeng vaenz gaengnaeh zawh hax gaeng, taengdeg Yezsuz tai yaq daeuq zaeu, ndaej najta yaq, paenqdix zux nwh taeng suq kauq ndaw *Sw Dij Sen* mai naeh, zux ruxndeq suq kauq naeh zawh hax Yezsuz daj sowh gaeng goanzlai hoak bae doq Yezsuz naeh.

<sup>17</sup> Koax daekgoanq Yezsuz rongx Lazsazluq daeq ndaw ngomz mohbujreuh og daeuj, hawj Lazsazluq daeuq zaeu naeh, sowh dij goanz daj Yezsuz zaemh yuq naeh, leztaen zoq aeu mbaed saeh naeh bae goq koanx koanx dwk goanzlai. <sup>18</sup> Baenzzaqnaeh goanzlai ruxnyinz sowh saeh ndaw fax Yezsuz hoak naeh, zoq bae raep dix. <sup>19</sup> Dij goanz Fahliqsaiq zoq goanz lej daj goanz hax: "Su lez, dij goanz dawj fax bae nowngz dix nauq eh, gaenqraeuz deaz dih hoak rawz mboq miz mah!"

---

<sup>P</sup>**12:13** *Hoahsanxnah* zawh kauq Cizboahlaiz, zoq zawh hax: "Vanz mawz jeuq piu." Jeh Yezsuz naeh puj Yaeuhtaiq aeu gaemz naeh biangz dij Sen.

<sup>q</sup>**12:13** Gaemz kauq naeh haeuz yuq Sw Lownx 118:26.

<sup>r</sup>**12:15** *Ciz'anz* zoq zawh hax Yezluqsaxlaengx chaenh.

\***12:15** Saxzazliqyaq 9:9.

### Puj Cizlah Zawx Taen Yezsuz Ta Ux

<sup>20</sup> Sowh dij goanz mwz Yezluqsaxlaengx jin'jeng, biangz dij Sen naeh, mbangj goanz zawh puj Cizlah.<sup>s</sup>

<sup>21</sup> Paenqdix bae dih cohsaenz Yezsuz goanz rongx hoak Faezliq naeh. Goanz naeh zawh dij goanz ndaw mbanj Zazliqliq longq Boahsaiqdaq naeh. Paenqdix daj dix hax: "Cuh aj, gaenqpiu zawx taen Yezsuz ta ux." <sup>22</sup> Faezliq bae haxdoq Anzdowhle, Anzdowhle ziq daj Faezliq zaemh bae haxdoq Yezsuz. <sup>23</sup> Yezsuz hax: "Taeng zwz dij Sen hawj Lug Dij Goanz ndaej najta yah. <sup>24</sup> Gux haxdoq su swhlit, maet kaeujmeg ux jixzawh mboq doak bae ndaw namh tai yaq, naengzgaj zawh maet doag. Jixzawh doak bae ndaw namh tai yaq, ngaed, maj ziq og rongz ndaej lai maet taeuq. <sup>25</sup> Gawz ngaiq gaj aen mingh dihndin naeh, gawz ziq laem aen mingh daengznauq naeh. Gawz venq viangh aen mingh dihndin naeh, gawz ziq ndaej aen mingh daengznauq naeh. <sup>26</sup> Gawz kvej gux, ziq baenz nowngz gux; gux yuq rawz, sowh dij goanz kvej gux naeh goj yuq rawz. Gawz kvej gux, Dez gux toj zaenzungq dix mboqyaq."

<sup>27</sup> "Gannaeh ndaw zaw gux dij taeuq, gux hax gaeng ndae nyeuz nix? Hax gaemz naeh maj: 'Dez aj, jeuq gux ni sowh gaunaeh.' Gaj gux zawh cho gaenqnaeh daeuj. <sup>28</sup> Dez aj, hawj daenh leztaen najta mawz!" Gau gaengnaeh miz hiang kauq daeq ndaw fax daeuj, hax: "Gux haeuz hawj daenh leztaen

najta gux, naengz daeuq hawj paenqdix leztaen najta gux." <sup>29</sup> Sowh goanzlai yuq haenz in naeh ruxnyinz hiang gaengnaeh yaq, mbangj goanz ziq hax: "Faxumj yah." Goj miz dij goanz hax: "Miz bin dij Sen daj dix hax kauq." <sup>30</sup> Yezsuz hax: "Hiang naeh mboq zawh cholaeng gux chung, zawh cholaeng su chung. <sup>31</sup> Mbaenqnaeh zawh zwz dij goanz dihndin zoah saenxpanq. Mbaenqnaeh do gvanx dihndin gaengnaeh zoah daem og nog.<sup>t</sup> <sup>32</sup> Zwz gux daeq dihndin zoah yaeuj mwz naeh, gux ziq lingz daengzle maz zawj gux." <sup>33</sup> Yezsuz hax dix zoah yaeuj mwz zawh hax dix rux zoah hoakzawz tai. <sup>34</sup> Yaq goanzlai daj dix hax: "Gaenqpiu ruxnyinz ndaw *Sw Dij Sen* hax, Jizduz zaeu daengznauq.\* Gaj mawz baenzzaqrawz hax: 'Lug Dij Goanz daeq dihndin zoah yaeuj mwz zuxbaenz' mawj? Goanz Lug Dij Goanz naeh zawh gawz ah?" <sup>35</sup> Yezsuz hax: "Gaenqrungh yuq dih su mboq ndowj yah. Gannaeh naengz miz gaenqrungh, gaenqsu baenz daeq yah, yaj zawj su hubhaeb gaj dih gaj ndaem. Sowh puj yuq dih ndaem daeq naeh, mboq ruxndeq bae rawz. <sup>36</sup> Gannaeh naengz miz gaenqrungh, gaenqsu baenz siq gaenqrungh naeh, hawj su baenz yaiz lug gaenqrungh." Yezsuz hax suq kauq naeh yaq, ziq ni paenqdix lamq mwz rawz mwz.

### Puj Yaeuhtaiq Mboq Sinq Yezsuz

<sup>37</sup> Yezsuz yuq doqnaj paenqdix hoak sowh saeh ndaw fax naeh lai taeuq, gaj paenqdix goj naengzgaj

<sup>s</sup>12:20 Inxnaeh hax puj Cizlah ingj mboq zawh hax gaj puj Cizlah, ingj rux zawh hax daengzle sowh puj mboq zawh puj Yaeuhtaiq naeh.

<sup>t</sup>12:31 Inxnaeh hax *do gvanx dihndin gaengnaehzoq* zawh hax: "do pi dwx nyeuz daengzle naeh."

\*12:34 Lownx 89:36.

mboq sinq dix. <sup>38</sup> Paenqdix mboq sinq dix zoq teu kauq Yixsaiqyaq, goanz puj zawxkauq hax naeh, hawj suq kauq dix hax naeh baenz zaeh. Yixsaiqyaq hoakzaqnaeh daj dij Sen hax:

"Zaeuj aj, gaenq gaenqraeuz laemh dwk daenh naeh, miz gawz sinq mux?  
Mawz hawj gawz ruxndeq doakriangz mawz mux?"<sup>u</sup>

<sup>39</sup> Baenzzaqrawz paenqdix mboq rux sinq? Zawh Yixsaiqyaq goj ndaej hax:

<sup>40</sup> "Dij Sen hawj ta paenqdix mbud,  
hawj zaw paenqdix hax nyaeb,  
Yaj ta paenqdix leztaen,  
ndaw zaw paenqdix ruxndeq,  
Yaj paenqdix dauh maz doq gux,  
gux zoq ya paenqdix ndae."<sup>v</sup>

<sup>41</sup> Yixsaiqyaq hax suq kauq naeh zawh Yixsaiqyaq haeuz leztaen najta Jizduz, suq kauq naeh zawh hax Jizduz.

<sup>42</sup> Daengz baenzzaqnaeh, puj saeq goj miz goanz lai sinq Yezsuz. Gaj paenqdix mboq ganz yuq doqnaj doqta daengzle yinq paenqdix sinq Yezsuz, jixzawh paenqdix yuq doqnaj daengzle yinq paenqdix sinq Yezsuz, dij goanz Fahliqsaiq rux daem paenqdix ni rownzndawcowq. <sup>43</sup> Paenqdix mboq yuq doqnaj daengzle yinq paenqdix sinq Yezsuz zawh paenqdix

ceu hawj dij goanz haenh nyeuz ceu hawj dij Sen haenh.

<sup>44</sup> Yezsuz caqsiq hax: "Gawz sinq gux, mboq zawh sinq gaj gux, goj zawh sinq laux nemz gux daeuj naeh. <sup>45</sup> Gawz leztaen gux, zoq zawh leztaen laux nemz gux daeuj naeh. <sup>46</sup> Gux zawh gaenqrungh, gux daeuj dihndin hawj sowh puj sinq gux naeh daengzle yuq dih ndaem ndowj gah. <sup>47</sup> Gux daeuj dihndin mboq zawh daeuj saenxpanq dij goanz, zawh daeuj jeuq dij goanz dihndin, baenzzaqnaeh, dij goanz gawz ruxnyinz kauq gux yaq mboq biak, mboq zawh gux haeggaj saenxpanq dix. <sup>48</sup> Sowh dij goanz viangh gux, mboq zaemz kauq gux naeh, haeggaj miz gaenq saenxpanq dix, vaenz now ndin mowd naeh zawh sowh kauq gux koanx naeh saenxpanq dix, hax dix hoak loang gaeng. <sup>49</sup> Baenzzaqrawz mah? Gux mboq zawh pinh hoakri gux koanx, zawh Dez nemz gux daeuj naeh nemz gux, hawj gux hax gaeng, koanx gaeng. <sup>50</sup> Gux goj ruxndeq gaenq dix nemz naeh zawh hawj dij goanz zaeu daengznauq. Baenzzaqnaeh, sowh gaenq gux koanx naeh zoq zawh gaenq Dez nemz gux koanx naeh."

### Yezsuz Saeh Cohsaenz Dix SoiQ Din

**13** <sup>1</sup> Daekgoanq Jeng Gvaq, Yezsuz ruxndeq taeng zwz hoakri ni dihndin dauh mwz zawj Dez ndaw fax. Yezsuz bwnz nwh dij goanz dix taeuq, zoq zawh sowh puj yuq jeh dij goanz dihndin naeh, dix nwh paenqdix taeng mowd. <sup>2</sup> Gau jin byaeuz naeh, do gvanx dij pi naeh haeuz coak Yaeuhdaq, coak dix aeu Yezsuz kai hawj sowh puj

<sup>u</sup>12:38 Gaemz kauq naeh yuq Sw Yixsaiqyaq 53:1.

<sup>v</sup>12:40 Le gaemz naeh haeuz yuq Sw Yixsaiqyaq 6:9-10.



daj Yežsuz hoak dangqbaih naeh. Goanz Yaeuhdaq naeh zoq zawh goanz lug zaiz Cizmaenh, goanz dij goanz Zazyoah naeh. <sup>3</sup> Yežsuz ruxndeq Dez ndaw fax haeuz gaj yowngh gaj aeu nyaengx mwz ndaw mungz dix, goj ruxndeq hoakri zawh daeq zawj dij Sen daeuj, toj daeuj dauh mwz zawj dij Sen mboqyaq. <sup>4</sup> Dix zoq dwnq ni haenz zongz, tod gongz sowj baihnog naeh, aeu kvaix paeng ux qiat koaxraengx. <sup>5</sup> Yaq daek maz banz naemx ux, soiq din cohsaenz dix, yaq naengz aeu kvaix jiatnaj qiat koaxraengx naeh jiat kawq. <sup>6</sup> Soiq maz taeng Cizmaenh-bihdowh, Cizmaenh-bihdowh zoq hax: "Zaeuj aj, mawz daz soiq din gux maj?" <sup>7</sup> Yežsuz yaeng: "Gaenq gux hoak naeh, gannaeh mawz mboq ruxndeq, gaj mwznaj mawz zoq ruxndeq eh." <sup>8</sup> Bihdowh hax: "Baenz mboq ndaej oh, gux mboq rux hawj mawz soiq din gux!" Yežsuz hax: "Jixzawh gux mboq soiq mawz, mawz daj gux zoq mboq miz gajraeng, sownq mawz zoq mboq miz." <sup>9</sup> Cizmaenh-bihdowh hax: "Zaeuj aj, haenx, mboq zawh soiq gaj din gux, soiq daengz mungz gux daj to gux ndoij." <sup>10</sup> Yežsuz hax: "Gawz aebdah yaq, laengmaz soiq gaj din zoq baenz eh, dihndai naengz gaj saw. Gaenqsu saw, gaj mboq zawh gaj goanz gaj saw." <sup>11</sup> Yežsuz haeuz ruxndeq zawh gawz daz kai dix, baenzzaqnaeh dix hax: "Gaenqsu mboq zawh gaj goanz gaj saw." <sup>12</sup> Yežsuz soiq din cohsaenz dix nauq yaq, zoq nungh gongz sowj baihnog naeh, daeuj naengh daeuj, daj paenqdix hax: "Gaenq gux hoak bae doq su naeh, su ruxndeq zawh hax gaeng vah?"

<sup>13</sup> Gaenqsu rongx gux hoak lauxswz, rongx gux hoak Zaeuj, rongx ndaej hoj, gux zoq bwnz zawh. <sup>14</sup> Gux zawh Zaeuj, zawh lauxswz, gux naengz soiq din su, gaenqsu goj baenz goanz lej soiq hawj goanz. <sup>15</sup> Gux hoak hawj su lez, hawj su zaep, hawj su zaep gaenq gux hoak bae doq su naeh. <sup>16</sup> Gux haxdoq su swhlit, puj koj mboq rux dwx nyeuz zaeuj dix, goanz zoah nemz naeh goj mboq rux dwx nyeuz goanz nemz dix naeh. <sup>17</sup> Gaenqsu ruxndeq le gaenq naeh, jixzawh bae hoak, zoq faengz yah. <sup>18</sup> Gux hax gaenq naeh mboq zawh hax daengz paenq su nauq, gux ruxndeq sowh dij goanz gux lowg naeh. Gaj gux lowg goanz gaengnaeh zawh hawj teu kauq *Sw Dij Sen* hax naeh, hawj gaemz naeh baenzzaeh. Ndaw *Sw Dij Sen* hax: "Goanz jin kaeuj gux naeh, aeu din deg gux."\* <sup>19</sup> Gaenqnaeh gannaeh naengz mboq baenzzaeh, gux zoq haxdoq su, hawj gaenqnaeh baenzzaeh zwzrawz, gaenqsu zoq sinq gux zawh laux haeggaj miz, miz daengznauq naeh.<sup>w</sup> <sup>20</sup> Gux haxdoq su swhlit, gawz doiq sowh goanz gux nemz bae naeh ndae, zoq zawh doiq gux ndae. Gawz doiq gux ndae, zoq zawh doiq laux nemz gux daeuj naeh ndae."

**Yežsuz Hax Miz Goanz Ux Rux Aeu Dix Kai  
Hawj Sowh Puj Daj Dix Hoak Dangqbaih Naeh**

<sup>21</sup> Yežsuz hax gaemz naeh yaq, ndaw zaw dij taeuj, zoq hax swh: "Gux haxdoq su swhlit, gaenqsu miz goanz ux rux kai gux." <sup>22</sup> Cohsaenz dix goanz lej lez naj goanz, mboq ruxndeq goanz dix hax naeh zawh gawz. <sup>23</sup> Cohsaenz dix miz goanz ux, zawh goanz Yežsuz nwh naeh, goanz naeh naengh

<sup>w</sup>13:19 *Laux haeggaj miz, miz daengznauq naeh* zoq zawh hax YEŽ'HOAHHUAH.

\*13:18 Lownx 41:9.

haenz Yezsuz. <sup>24</sup> Cizmaenh-Bihdowh yaepta mwz doq goanz naeh, yaix goanz naeh cham Yezsuz, cham Yezsuz goanz dix hax naeh zawh gawz. <sup>25</sup> Yaq goanz cohsaenz gaengnaeh zoq daeb bae baeg'aek Yezsuz, cham dix: "Zaeuj aj, zawh gawz ah?" <sup>26</sup> Yezsuz yaeng: "Gux yup ndeaj binx ix ux hawj gawz, zoq zawh gawz." Yaq dix yup ndeaj binx ix ux, yenh hawj Yaeuhdaq, goanz lug zaiz Cizmaenh, goanz dij goanz ndaw Zazyoah naeh. <sup>27</sup> Yaeuhdaq deq binx yaq, Sazdanz zoq mwz ndang dix.<sup>x</sup> Yezsuz daj dix hax: "Mawz daz hoak gaeng, zoq bae hoak naeuz kvaic ux ndeh." <sup>28</sup> Daengz zongz mboq miz gawz ruxndeq Yezsuz baenzaqrawz daj Yaeuhdaq hoakzaqnaeh hax. <sup>29</sup> Yaeuhdaq zawh goanz gaem jenz, baenzaqnaeh mbanj goanz faeklahi Yezsuz yaix dix bae swx za'hoq Jeng, raj yaix dix aeu gaeng bae hawj puj luk. <sup>30</sup> Yaeuhdaq jin ndeaj binx gaengnaeh yaq, zoq cenq og bae. Gau gaengnaeh zawh zang'haemh.

### Yezsuz Saengq Diauq Mawq Ux

<sup>31</sup> Yaeuhdaq og bae yaq, Yezsuz zoq hax: "Gannaeh dij Sen hawj Lug dij Goanz ndaej najta, dij Sen goj daeqzawj Lug dij Goanz ndaej najta. <sup>32</sup> Dij Sen daeqzawj Lug dij Goanz ndaej najta, haenx, dij Sen toj cenq daeqzawj hoakri dix hawj Lug dij Goanz ndaej najta. <sup>33</sup> Paenq lug gux aj, gux daj su zaemh yuq mboq miz jij gau yaj. Miz gaemz kauq ux, gux ndaej daj puj Yaeuhtaiq hax, gannaeh gux goj daj su hax, zoq zawh: 'Mwznaj gaenqsu cha gux, gaj dih gux mwz naeh, gaenqsu mwz mboq baenz.' <sup>34</sup> Gux saengq su diauq mawqmwq

ux, zoq zawh gaenqsu baenz goanz lej nwh goanz. Gux hoakzaqrawz nwh su, gaenqsu zoq hoakzaqrawz dungznwh. <sup>35</sup> Jixzawh gaenqsu goanz lej nwh goanz, goanzlai zoq ruxndeq gaenqsu zawh cohsaenz gux eh."

### Bihdowh Rux Sam Mbaed Mboq

#### Yinq Dix Ruxnaj Yezsuz

<sup>36</sup> Cizmaenh-bihdowh daj Yezsuz hax: "Zaeuj aj, mawz mwz rawz ah?" Yezsuz yaeng: "Dih gux mwz naeh, gannaeh mawz nowngz gux mwz mboq baenz, gaj doaklaeng mawz rux nowngz gux mwz." <sup>37</sup> Bihdowh hax: "Zaeuj aj, baenzaqrawz gannaeh gux nowngz mawz mwz mboq baenz mux? Gux venq cho mawz viangh aen mingh." <sup>38</sup> Yezsuz hax: "Mawz venq cho gux viangh aen mingh maj? Gux haxdoq mawz swhlit, hwnz naeh daekgoanq dij gaeq kaen, mawz sam mbaed mboq yinq gux."

### Yezsuz Zawh Ka loh, Zawh

#### Kauq Jing, Zawh Aen Mingh

**14** <sup>1</sup> "Ndaw zaw su laek dij, gaenqsu baenz sinq dij Sen, goj baenz sinq gux. <sup>2</sup> Yuq ndaw rownz Dez gux, miz dihndowj lai taeuq. Jixzawh mboq miz, gux zoq haxdoq su ndowj yah. Gux zawh mwz dox dihndowj taj su. <sup>3</sup> Gux mwz dox dihndowj taj su, mwznaj gux toj daeuq daeuj raep su mwz dih gux naeh mboqyaq. Hoakzaqnaeh gux yuq dih rawz, gaenqsu goj zaemh yuq dih rawz. <sup>4</sup> Dih gux mwz naeh, gaenqsu ruxnaj ka loh." <sup>5</sup> Dozmax hax: "Zaeuj aj, gaenqpiu mboq ruxndeq dih mawz mwz naeh, gaenqpiu hoakzaqrawz ruxnaj ka loh ah?"

<sup>x</sup>13:27 *Sazdanz* zawh do pi dwx nyeuz daengzle naeh.

<sup>6</sup>Yežsuz daj dix hax: "Gux zoq zawh ka loh mwz zawj dij Sen naeh, zawh kauq jing, zawh aen mingh hawj dij goanz zaeu naeh. Dij goanz jixzawh mboq maengx gux, zoq mboq miz gawz rux ndaej daj Dez ndaw fax dungzndae. <sup>7</sup>Jixzawh gaenqsu ruxndeq zaw gux, zoq goj ruxndeq zaw Dez gux mboqyaq. Daeq vaenznaeh mwz, gaenqsu ruxndeq zaw dix eh. Gaenqsu haeuz leztaen dix eh." <sup>8</sup>Faezliq hax: "Zaeuj aj, vanz mawz hawj piu leztaen Dez ndaw fax, gaenqpiu zoq laemjzaw eh." <sup>9</sup>Yežsuz hax: "Faezliq, gux daj gaenqsu zaemh yuq ndowj baenzzaqnaeh, gaenqmawz naengz mboq ruxndeq zaw gux maj? Gux daj Dez zawh laux ndeu. Gawz leztaen gux zoq zawh leztaen Dez ndaw fax. Mawz baenzzaqrawz naengz hax: 'Hawj piu leztaen Dez ndaw fax,' mux? <sup>10</sup>Gux yuq ndaw Dez ndaw fax, Dez ndaw fax yuq ndaw gux, mawz mboq sinq maj? Suq gux daj su hax naeh, mboq zawh pinh hoakri gux hax, zawh Dez yuq ndaw gux ndowj naeh hoak sowh saeh mizgaj dix rux hoak naeh. <sup>11</sup>Gux yuq ndaw Dez ndaw fax, Dez ndaw fax yuq ndaw gux. Gaemz naeh gaenqsu hoj sinq. Jixzawh su biak gaemz naeh yaq naengz sinq gux mboq baenz, gaenqsu goj baenz cholaeng sowh saeh gux hoak naeh sinq gux. <sup>12</sup>Gux haxdoq su swhlit, sowh saeh gux hoak naeh, sowh puj sinq gux naeh goj hoak baenz, naengz rux hoak sowh saeh dwx nyeuz le gaenqnaeh. Baenzzaqrawz rux hoak dwx nyeuz mah? Gux zawh mwz zawj Dez ndaw fax mbezngaz. <sup>13</sup>Gaenqsu hoak najgaengx gux yungq zoah gaeng, gaenqsu vanz gaeng gojndae, gux goj awj su mboqyaq, hoanx naeh hawj Dez ndaw fax

cholaeng lug zaiz dix ndaej najta. <sup>14</sup>Gaenqsu hoak najgaengx gux yungq zoah gaeng, daengz gaenqsu vanz gaeng gojndae, gux goj awj su mboqyaq.

### Yežsuz Yinq Aeu Minghkoan Dij Sen Hawj

<sup>15</sup>"Su ngaiq gux, su toj biak sowh gaenq gux saengq naeh mboqyaq. <sup>16</sup>Gux vanz Dez ndaw fax, dix zoq hawj laux saeh paenq goanz dij Sen naeh daeuj, hawj dix daj su zaemh yuq daengznauq. <sup>17</sup>Laux naeh zoq zawh minghkoan dij Sen jing naeh. Dij goanz dihndin lez mboq taen dix, goj mboq ruxndeq zaw dix, baenzzaqnaeh dij goanz dihndin mboq rux zaemz dix. Gaj dix yuq jeh su ndowj, mboq ndowj lai mbeh'ej yuq ndaw ndang su eh, baenzzaqnaeh gaenqsu ruxndeq zaw dix.<sup>y</sup> <sup>18</sup>Gux mboq rux viangh su, mboq rux hawj su baenz lugbyax, gux daeuq dauh daeuj dih su inxnach. <sup>19</sup>Mboq ndowj lai, dij goanz dihndin mboq rux daeuq ndaej taen gux, gaj gaenqsu leztaen gux. Unj hoakri gux zaeu, baenzzaqnaeh gaenqsu goj rux zaeu. <sup>20</sup>Taeng vaenz gaengnaeh, gaenqsu zoq ruxndeq gux yuq ndaw Dez ndaw fax, gaenqsu yuq ndaw gux, gux goj yuq ndaw su. <sup>21</sup>Gawz ruxndeq sowh gaenq gux saengq naeh goj caqsiq biak bae hoak, gawz zoq zawh ngaiq gux. Gawz ngaiq gux, Dez gux ngaiq dix mboqyaq, hoakri gux goj ngaiq dix, yaq hawj dix taen gux, hawj dix ruxnaj gux singjringh." <sup>22</sup>Yaeuhdaq, mboq zawh goanz dij goanz ndaw Zazyoah naeh, cham Yežsuz: "Zaeuj aj, mawz baenzzaqrawz hawj gaj piu taen hoakri mawz, baenzzaqrawz mboq hawj daengz dij goanz

---

<sup>y</sup>14:17 Gaemz naeh miz jij bwnz ux goj hoakzaqnaeh hax: *Gaj dix daj su zaemh ndowj, goj yuq ndaw su, baenzzaqnaeh gaenqsu ruxndeq zaw dix.*

dihndin taen mawj?" <sup>23</sup> Yezsuz yaeng: "Jixzawh gawz ngaiq gux, zoq rux caqsiq biak kauq gux, Dez gux ngaiq dix mboqyaq, yaq gux daj dez gux bae zawj dix, daj dix zaemh ndowj. <sup>24</sup> Gawz mboq ngaiq gux, zoq mboq biak kauq gux. Suq kauq su ruxnyinz naeh, mboq zawh gux haeggaj hax, zawh Dez nemz gux daeuj naeh yaix gux hax. <sup>25</sup> Zwz gux naengz daj su zaemh yuq, gux haeuz daj su laemh le gaenqnaeh. <sup>26</sup> Gajlej Dez ndaw fax goj naengz rux nemz laux saeh paenq goanz dij Sen naeh daeuj saeh gaenqsu hoak najgaengx gux, laux naeh zoq zawh Minghkoan dij Sen, dix rux gaj yowngh gaj zau su, goj hawj su nwh ndaej daengz suq kauq gux daj su hax naeh. <sup>27</sup> Gux hawj zaw su yuqvangq, hawj zaw su yuqvangq daj zaw gux dungzlumj. Gux hawj su yuqvangq mboq daj dij goanz dihndin hawj su yuqvangq naeh dungzlumj. Gaenqsu laek dij, goj laek to'zaw liak. <sup>28</sup> Gaenqsu ndaej biak gux hax yaq, gux mwz naengz daeuq dauh daeuj zawj su. Dih gux mwz naeh zawh zawj Dez ndaw fax. Dez ndaw fax dwx nyeuz gux. Baenzaqnaeh jixzawh su zawh ngaiq gux zaeh, su ruxnyinz gux hax, gux mwz zawj Dez, su toj faengz mboqyaq. <sup>29</sup> Gannaeh suq saeh naeh naengz mboq baenzaeh, gux haeuz haxdoq su daekgoanq, suq saeh naeh baenzaeh zwzrawz, hawj su rux sinq. <sup>30</sup> Do gvanx dihndin gaengnaeh zaekgaj maz taeng yaj, baenzaqnaeh gux mboq daj su laemh lai tem yaj. Dix dauq dih aeu gux hoakrawz mboq miz, <sup>31</sup> gaj gux hoak gaenqnaeh, hoak gaenq Dez ndaw fax nemz gux hoak naeh, zawh hawj dij goanz dihndin ruxndeq gux ngaiq Dez. Dwnq maz, gaenqraeuz bae eh!"

### Yezsuz Zawh Maex Maegkaeu'it Jing

**15** <sup>1</sup> "Gux zawh maex maegkaeu'it jing, Dez gux zawh goanz zauzhuz sownmaeg naeh. <sup>2</sup> Go gux naeh, ngah dix, ngah rawz mboq kwnj maeg, Dez gux zoq daet ni; ngah rawz kwnj maeg, Dez gux zoq zoih sawrik, hawj paenqdix kwnj maeg lai tem. <sup>3</sup> Gannaeh gaenqsu cholaeng sowh kauq gux laemh dwk su naeh, gaenqsu haeuz saw eh. <sup>4</sup> Gaenqsu yauq yuq ndaw gux ndowj oaj, gux goj yuq ndaw su ndowj. Jixzawh ngah maegkaeu'it mboq daj go maegkaeu'it dungzrangh, ngah dix zoq mboq rux haeggaj kwnj maeg. Jixzawh gaenqsu mboq yuq ndaw gux ndowj, gaenqsu goj rux baenzaqnaeh. <sup>5</sup> Gux zawh maex maegkaeu'it, gaenqsu zawh ngah dix. Jixzawh gaenqsu ni gux, gaenqsu zoq hoak gaeng mboq baenz. Gaj gawz yuq ndaw gux ndowj, gux goj yuq ndaw dix ndowj, dix zoq kwnj maeg lai yah. <sup>6</sup> Jixzawh gawz mboq yuq ndaw gux ndowj, zoq daj sowh ngah aeu viangh bae baihnog naeh dungzlumj, choj maz, zoah dij goanz aeu viangh bae ndaw faez pyaeu. <sup>7</sup> Jixzawh gaenqsu yuq ndaw gux ndowj, kauq gux goj yuq ndaw su ndowj, gaenqsu zawx aeu gaeng, vanz, zoq hawj su. <sup>8</sup> Jixzawh gaenqsu do kwnj maeg, hoak cohsaenz gux singjringh, daenh zoq leztaen najta Dez gux eh. <sup>9</sup> Gux nwh su daj dez gux nwh gux dungzlumj, gaenqsu yauq zwzzwz nwh ndaej gux hoanx naeh nwh su oaj, gaenqsu goj zwzzwz ngaiq gux oaj. <sup>10</sup> Jixzawh su biak le diauq gux saengq su naeh, su zoq zwzzwz nwh ndaej gux hoanx naeh nwh su, su zoq zwzzwz ngaiq gux. Gux goj biak le diauq Dez gux saengq gux naeh, gux goj zwzzwz nwh

ndaej Dez hoanx naeh nwh gux, gux goj zwzzwz ngaiq Dez gux. <sup>11</sup> Gux haxdoq su le gaenqnaeh, zawh hawj gaenqfaengz gux yuq ndaw zaw su, hawj zaw su miz gaj gaenq faengz. <sup>12</sup> Gaenqsu yauq goanz lej nwh goanz oaj, daj gux nwh su dungzlumj; diauq naeh zawh gaenq gux saengq su hoak. <sup>13</sup> Dij goanz, jixzawh gawz cholaeng paenq dungzbowh dix viangh aen mingh, nwh gawz zawh nwh baenzaqnaeh dauh neh. <sup>14</sup> Jixzawh gaenqsu hoak diauq gux saengq su naeh, gaenqsu zoq zawh dungzbowh gux yah. <sup>15</sup> Mbaenqnaeh gux mboq aeu su hoak puj koj tem eh, unj puj koj mboq ruxndeq sowh saeh zaeuj dix hoak naeh. Gux zawh aeu su hoak dungzbowh, unj, gux daeq zawj Dez ruxnyinz gaeng, gux goj haeuz haxdoq su nauq. <sup>16</sup> Mboq zawh gaenqsu lowg gux, zawh gux haeggaj lowg su, yaq nemz su bae, hawj su daj maexmaeg dungzlumj kwnj maeg, zoq zawh kwnj sowh maeg mboq rux naeh naeh. Baenzaqnaeh, gaenqsu hoak najgaengx gux yungq zoah gaeng, daengz daj Dez ndaw fax vanz gaeng, dix goj hawj su mboqyaq. <sup>17</sup> Gux hoakzaqnaeh saengq su, zawh hawj su goanz lej nwh goanz.

### Dij Goanz Dihndin Rux Hwnq Cohsaenz Yezsuz

<sup>18</sup> "Dij goanz dihndin hwnq su zwzrawz, gaenqsu hoj ruxndeq, paenqdix naengz mboq hwnq su, paenqdix haeuz hwnq gux yaq. <sup>19</sup> Dij goanz gawz goj ngaiq gaenq hoakri. Jixzawh gaenqsu zawh gaenq dihndin, dij goanz dihndin toj ngaiq su mboqyaq. Gaj gaenqsu mboq zawh gaenq dihndin, zawh gaenqgux lowg gaenqsu daeq dihndin maz,

baenzaqnaeh, dij goanz dihndin zoq hwnq su. <sup>20</sup> Gaenqsu ruxndeq gux haeuz daj su hoakzaqnaeh hax yaq: 'Puj koj mboq rux dwx nyeuz zaeuj dix.' Gawz vazkuz gux, gawz goj rux vazkuz su mboqyaq. Gawz biak kauq gux, gawz goj rux biak kauq su mboqyaq. <sup>21</sup> Paenqdix mboq ruxndeq zaw laux nemz gux daeuj naeh, baenzaqnaeh, su hoak najgaengx gux, paenqdix goj rux hoakzaqnaeh dwk su. <sup>22</sup> Jixzawh gux mboq ndaej daeuj zau paenqdix, paenqdix zoq mboq miz gaenqloang, gaj gannaeh gaenq loang paenqdix dih aeu ngej bae rawz mboq miz. <sup>23</sup> Gawz hwnq gux, goj hwnq Dez gux. <sup>24</sup> Jixzawh gux mboq ndaej yuq doqnaj doqta paenqdix hoak sowh saeh mboq sanz miz gawz hoak naeh hawj paenqdix leztaen, paenqdix zoq mboq miz gaenqloang. Gaj gannaeh paenqdix haeuz ndaej leztaen, goj naengz hwnq gux daj Dez gux. <sup>25</sup> Hoakzaqnaeh zoq zawh hawj gaemz kauq ndaw sw fahlidij Sen aeu hawj paenqdix naeh baenzaeh, ndaw sw fahlidij hax: 'Paenqdix yumq hwnq gux taeuq.' \*Teu gaemz naeh taeuq. <sup>26</sup> Gux daeq dih Dez ndaw fax naeh nemz laux saeh paenq goanz dij Sen naeh daeuj, laux naeh zoq zawh minghkoan dij Sen jing naeh, dix daeq zawj Dez ndaw fax daeuj zwzrawz, zawh daeuj haxdoq daenh gux zoq zawh Jizduz. <sup>27</sup> Gaenqsu daeq zwzrawz maz bwnz daj gux zaemh yuq, baenzaqnaeh hoakri gaenqsu goj yauq haxdoq daenh gux zawh Jizduz."

**16** <sup>1</sup> "Gux haxdoq su le gaenqnaeh, zawh hawj su mboq rux faedlaemx. <sup>2</sup> Su ruxndeq mboq zawh hax gaj rux miz dij goanz daem su ni rownzndawcowq, zaekgaj taeng zwz yah,

\*15:25 Lownx 35:19; 69:5.

paenqdix goj naengz rux faeklah kaj gaenqsu zoq zawh kvej dij Sen. <sup>3</sup> Paenqdix hoakzaqnaeh hoak, zawh paenqdix mboq ruxndeq zaw Dez ndaw fax, goj mboq ruxndeq zaw gux. <sup>4</sup> Gux haxdoq su le gaenqnaeh, zawh taeng zwz maz, hawj su nwh ndaej gux haeuz ndaej daj su hax yaq.

### **Najgaengx Minghkoan Dij Sen Daeuj Hoak Naeh**

"Koax daekgoanq gux naengz daj su zaemh yuq, gux zoq mboq haxdoq su le gaenqnaeh. <sup>5</sup> Gannaeh gux dauh mwz zawj laux nemz gux daeuj naeh, gaj gaenqsu mboq miz gawz rux cham gux: 'Mawz mwz rawz ah?' <sup>6</sup> Gux haxdoq su le gaenqnaeh, ndaw zaw su zoq yuqraix. <sup>7</sup> Gaj gux goj haxdoq su sw, gux mwz zawh cholaeng su ndae. Jixzawh gux mboq mwz, laux saeh paenq goanz dij Sen naeh zoq mboq daeuj zawj su. Gux mwz, zoq nemz dix daeuj. <sup>8–11</sup> Dij goanz dihndin mboq sinq gux, baenzaqnaeh Minghkoan dij Sen daeuj zwzrawz, hawj dij goanz dihndin yinq paenqdix hoak loang gaenqnaeh. Mboq ndowj gux zoq mwz zawj Dez ndaw fax, gaenqsu mboq ndaej leztaen gux tem. Baenzaqnaeh, Minghkoan dij Sen daeuj zwzrawz, goj hawj dij goanz dihndin yinq gaenqgux mboq miz gaenqloang. Do gvanx dihndin naeh haeuz zoah saenxpanq, baenzaqnaeh Minghkoan dij Sen daeuj zwzrawz, hawj dij goanz dihndin ruxndeq mwznaj paenqdix goj zoah saenxpanq.

<sup>12</sup> "Gux naengz miz lai yowngh taeuq haxdoq su, gaj gannaeh su tw mboq ndaej. <sup>13</sup> Minghkoan dij Sen jing naeh, dix daeuj zwzrawz, dix zung su, hawj su ruxndeq daengzle sowh kauq jing naeh. Dix mboq zawh pinh hoakri dix hax, dix ruxnyinz gaeng,

dix zoq hax gaeng, dix naengz haxdoq su sowh saeh mwznaj naeh. <sup>14</sup> Dix ruxnyinz gux hax gaeng, dix zoq haxdoq su, hoakzaqnaeh, dix zoq hawj su leztaen najta gux. <sup>15</sup> Dez miz gaeng, goj zawh gaenq gux; baenzaqnaeh gux zux hax, Minghkoan dij Sen ruxnyinz gux hax gaeng, dix zoq haxdoq su wzma.

### **Cohsaenz Yezsuz Rux Yuqraix, Gaj Doaklaeng Paenqdix Zoq Faengz Yah**

<sup>16</sup> "Mboq ndowj lai, gaenqsu zoq mboq ndaej taen gux tem eh; daeuq gvaq mboq ndowj lai, gaenqsu naengz daeuq ndaej taen gux." <sup>17</sup> Yaq cohsaenz dix miz jij goanz ux, goanz lej daj goanz hax: "Dix daj gaenqraeuz hax: 'Mboq ndowj lai, gaenqsu zoq mboq ndaej taen gux tem eh; daeuq gvaq mboq ndowj lai, gaenqsu naengz daeuq ndaej taen gux.' Dix goj hax: 'Gux mwz zawj Dez ndaw fax.' Le gaenqnaeh zawh hax gaeng mux?" <sup>18</sup> Paenqdix goq laemh laemh: "Gaenqdix hax 'mboq ndowj lai,' zawh hax gaeng mux? Gaenqraeuz mboq ruxndeq dix hax gaeng." <sup>19</sup> Yezsuz ruxndeq paenqdix zawx cham dix, zoq hax: "Gux hax: 'Mboq ndowj lai, gaenqsu zoq mboq ndaej taen gux tem eh; daeuq gvaq mboq ndowj lai, gaenqsu naengz daeuq ndaej taen gux.' Gaenqsu cho le gaemz naeh dungzcham maj? <sup>20</sup> Gux haxdoq su sw, lit, gaenqsu rux haej, gongz, gaj dij goanz dihndin faengz. Gaenqsu rux yuqraix, gaj doaklaeng gaenqsu zoq ndaej faengz. <sup>21</sup> Puj nyingz gau zowngx lug naeh chaej taeuq, baenzaqnaeh gau zowngx lug naeh puj nyingz yuqraix taeuq. Gaj lug zowngx daeuj yaq, zaemz miz goanz ux zowngx daeuj dihndin, zoq lumz gaenq chaej dix nauq. <sup>22</sup> Mbaenqnaeh gaenqsu goj

baenzaqnaeh yah, gaenqsu yuqraix yah, gaj gux daeuq taen su zwzrawz, zaw su zoq faengz yah; sowh gaenq faengz naeh mboq miz gawz longx bae ndaej. <sup>23</sup> Taeng vaenz gaengnaeh, gaenqsu gaeng goj mboq yungq cham gux eh. Gux haxdoq su swhlit, gaenqsu hoak najgaengx gux yungq zoah gaeng, gaenqsu vanz Dez ndaw fax, dix toj hawj su mboqyaq. <sup>24</sup> Gaj maz taeng gannaeh gaenqsu naengz mboq sanz haeggaj cholaeng hoak najgaengx gux vanz Dez ndaw fax gaeng. Mbaenq naeh gaenqsu cholaeng hoak najgaengx gux vanz, gaenqsu toj ndaej mboqyaq, hawj su faengz nyauznyauz.

### **Yeysuz Haeuz Bex Gaenq Dihndin**

<sup>25</sup> "Le gaenqnaeh, koax daekgoanq gux aeu bixliq daj gaenqsu hax. Zaekgaj taeng zwz yah, gux mboq aeu bixliq daj gaenqsu hax, gux aeu sowh saeh Dez ndaw fax naeh haxdoq su swhlit. <sup>26</sup> Taeng zwz naeh, gaenqsu hoak najgaengx gux yungq zoah gaeng, gaenqsu mboq yungq hoakri gux saeh su vanz Dez ndaw fax, gux haxdoq su, su yumq haeggaj vanz

Dez ndaw fax. <sup>27</sup> Baenzaqrawz hoakzaqnaeh hax mah? Gaenqsu haeuz ngaiq gux, goj sinq gux zawh daeq zawj Dez ndaw fax daeuj, baenzaqnaeh Dez ndaw fax nwh su taeuq. <sup>28</sup> Gux daeq zawj Dez ndaw fax daeuj, daeuj dihndin. Gux daeuq ni dihndin, mwz zawj Dez ndaw fax." <sup>29</sup> Cohsaenz dix hax: "Mawz lez, gannaeh mawz zawh hax swhlit, mboq zawh aeu bixliq hax. <sup>30</sup> Gannaeh gaenqpiu ruxndeq mawz mboq miz gaeng mboq ruxndeq; gawz daz cham gaeng, daengz dix mboq cham, mawz goj haeuz ruxndeq dix daz cham gaeng. Baenzaqnaeh, gaenqpiu sinq mawz zawh daeq dih dij Sen naeh daeuj." <sup>31</sup> Yeysuz hax: "Gannaeh gaenqsu sinq wx? <sup>32</sup> Su lez mah, zaekgaj taeng zwz yah, haeuz taeng yah, gaenqsu dungzbyaeg,\* dangq goanz dangq dauh bae dih hoakri, low gaj goanzdoag gux. Laemh zaeh maz, mboq zawh goanzdoag gux, unj miz Dez daj gux zaemh yuq. <sup>33</sup> Gux aeu le gaenqnaeh haxdoq su, zawh hawj su yuq ndaw gux ndaej yuqvangq. Yuq dihndin, gaenqsu miz aen nanq, gaj gaenqsu yumq yuq vangqdangh, gux haeuz bex gaenq dihndin."

---

\*16:32 Saxzazliqyaq 13:7.